

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

¹ Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

² Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni. ³ Judá con Tamar gujc xczajn Fares con Zara. Fares gujc xtd Esrom, Esrom gujc xtd Aram. ⁴ Aram gujc xtd Aminadab. Aminadab gujc xtd Naasón. Naasón gujc xtd Salmón. ⁵ Salmón con Rahab gujc xczajn Booz. Booz con Rut gujc xczajn Obed. Obed gujc xtd Isaí. ⁶ Isaí gujc xtd reii David. David con nani gujc cháäl Urías gujc xczajn Salomón.

⁷ Salomón gujc xtd Roboam. Roboam gujc xtd Abías. Abías gujc xtd Asa. ⁸ Asa gujc xtd Josafat. Josafat gujc xtd Joram. Joram gujc xtd Uzías. ⁹ Uzías gujc xtd Jotam. Jotam gujc xtd Acáz. Acáz gujc xtd Ezequías. ¹⁰ Ezequías gujc xtd Manasés. Manasés gujc xtd Amón. Amón gujc xtd Josías. ¹¹ Josías gujc xtd Jeconías con rebetzni cheni huij reben Israel pres lo guedx Babilonia.

¹² Che gudejd huij rebejnnga pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. ¹³ Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. ¹⁴ Azor gujc xtd Sadoc. Sadoc gujc xtd Aquim. Aquim gujc xtd Eliud. ¹⁵ Eliud gujc xtd Eleazar. Eleazar gujc xtd Matán. Matán gujc xtd Jacob. ¹⁶ Jacob gujc xtd José cháäl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajñli toAbram cheni gubajñliza toreii

David. Tzudajza rexagdoo najc reni gudejd cheni gubajñli toDavid cheni huijli rebeñ Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchñaani José ni gac cháälni. Per ansde xca' sa'reni, Marii agac nuxi'nni sa'csi biääd Sprit Dxi xten Dios lojni. ¹⁹ José com najcni te beñsa'c, di rlajzni nuro'nni Marii nez loj rebeñ te niacbeereni, ni'c bejni xhigab Guronxhiga'tzni Marii. ²⁰ Xhigabga cayujni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxi xten Dios. ²¹ Che gaal xi'nni cuälajluni Jesús sa'csi laani guslaani rexpejni lo rextoljreni.

²² Guiraa redee gujc si'c te guzobj diidx ni gunii tej ni bacuaa xtidx Dios. Räjpni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajñ con nuure).

²⁴ Che gubajñ José lo bacal, bejni si'cni räjp xangl Dad lojni. Cua'ni Marii gujc cháälni. ²⁵ Luxh dini niembeeni si'c cháälni dxejli cheni gudejd gojl xingangalojni ni gulälajni Jesús.

2

Che biädhuii rebeñ nanduxh ni laa remagos lojni

¹ Cheni gojl Jesús neñ guedx Belén xten guedx Judea, najc Herodes reii xten guedx Judea. Dxejc bidzujñ rebeñ-najn ni najc remagos, siädreni nejz cadre rliejn gubijdx, bidzujñreni guedx Jerusalén. ² Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxlinu, ni'cni siopdoṅnuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani rului xleii Moisés lo rebejn te gunabdiidxni lojreni:

—¿Caro gaal Crist?

⁵ Laareni räjpreni:

—Neṅ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru hui loj reguedxro xten guedx Judea sa'csi neṅ guedjdxre guirii tej nani guinibee, te ni ga'p rexpənä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jiädniitu loä te näjza narä chaganäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni lałtis niydni lojreni. Che bidzujnlireni cadro yu' bázga, dxejcru guzobdx bajlga. ¹⁰ Che bahuii remagos loj bajlga, rbalazduxhneni. ¹¹ Si'c bidzujnreni. Che biu'reni neṅ yu', bahuiireni lo bázga con xnanni Marii. Dxejcti bazuxhjbreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejxh. ¹² Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluiloj_{ni} lo José lo bacal_l, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguil Herodes biuxe're sa'csi rlajzni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbäz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p iyz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

¹⁸ Biejn xse' bejn neñ guedx Ramá, te yälhuinduxh, te yälrbedxdij, yälrbedxnen:
laa Raquel ni roon yejc rexi'nini.

Naaddini jiäj_l lajzni sa'csi agujt rexi'nini.

¹⁹ Cheni gujt Herodes, dxejc lo te bacal_l huiluiloj xangl Dios loj José neñ Egipto. ²⁰ Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlajz ju't biuxe're.

²¹ Dxejcti huistie José, cua'ni biuxe' näjza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuuini ro'c. Dxejc gunisac Dios lojni loj te bacal_l, ni'c huijni lo reguejdx xten Galilee. ²³ Dxejc biädläjzni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

3

Juan Bautist basule' xtidx Dios loj rebejn
(Mr. 1:1-8; Lc. 3:1-9, 15-17; Jn. 1:19-28)

¹ Nen redxejga biääd Juan Bautist lo reyubijdz xten guedx Judea, ro'c cagulijdxni, ² cayäjjni:

—Colgusiechlajztu rextojltu sa'csi xcälrnibee Dios abidzunjajxhni.

³ Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh.

⁵ Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadi-ajgreni xtiidxni. ⁶ Che ruxhobdojlreni xtojlrereni, rutiobnis Juanreni ro' gueu Jordán.

⁷ Che bahuiini siääd xhidajl reben guidoo ni najc re-farisee näjza ni najc resaducee, rljazreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu balijdxtu guxuntu loj xcälrdxe'ch Dios ni siääd? ⁸ Colguibansa'c si'cni nungäjł te fiipac rebejn guliipac abasiechlajztu.

⁹ Na'c litis guntu xhigab naatu: “İNi nurnu najcnu rexag-doo toAbram!” Rniliä lojtu, sajç xca' Dios reguijre gunni gacreni rexi'n toAbram. ¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹ Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Beñsacduxhni. Niçla xcura'chni digacdi chanää. ¹² Aca'ni xhi cojn gusiani triuu xtenni te

chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni. ¹⁴ Niluxh naaddi Juan gutiobnis Jesús. Räjpn Juan lojni:

—Luj nanab gutiobnislu narä, niluxh naj alga luj siäädllu loä te gutiobnisälu.

¹⁵ Dxejc räjpn Jesús lojni:

—Basaan gacni si'c naj, sa'csi nanab gusoobnu guiraa ni rrajz Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädjajt Sprit Dxi xten Dios si'c te palom, biäjtni lojni. ¹⁷ Dxejc xhaguibaali biejn diajgreni te xse' ni räjpn:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz

(Mr. 1:12-13; Lc. 4:1-13)

¹ Dxejc bejn Sprit Dxi xten Dios huij Jesús nez lo reyubijdz te nejzga nuhual bendxab Jesús.

² Che gulujx bacua'n Jesús tiuu gubijdx, tiuu guxhijn, gulaanni. ³ Sas biääd bendxab lojni, räjpn:

—Palga guliilu Xi'n Dioslu, gunibee gac reguijre yätx-tiil.

⁴ Badzu' Jesús diidxre lojni, räjpn:

—Loj reguijtz xten Dios caj scree: “Xhet ganaxdi yätx-tiil guibajn rebejn; sibajnzani con guiraa diidx nani rni Dios.”

⁵ Dxejcti huinä beṇdxab Jesús guedx Jerusalén. Gulä'pnini jiaa yejc xques guidoro. Dxejcro räjp beṇdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtZ Dios:

Sinibee Dios rexanglni ga'preni luj;
siliäsreni luj con ṇaareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtZ Dios: “Na'c fallu Dad ni najc Xtioslu.”

⁸ Stee huält huinä beṇdxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälṇnasa'creni. ⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec beṇdxab! Scree caj loj rexquijtZ Dios: “Dad Xtioſtislū ganlu; lojtisni chulu.”

¹¹ Dxejcti gubicaj beṇdxab loj Jesús. Dxejc biääd rexangl Dios biädhuiireni Jesús.

Gusloj Jesús cayujn xtzuunni

(Mr. 1:14-15; Lc. 4:14-15)

¹² Che biejn diajg Jesús yu' Juan neṇ ladzguiib, huijni nez Galilee. ¹³ Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejn nani di gac rexpen Israel.

¹⁶ Rebejn nani rbäjz neṇ te yälcäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

San Mateo 4:17 8 San Mateo 4:25

¹⁷ Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibaṅsa'ctu sa'csi abidzṅgajxh xcälrnibee Dios.

Che gurejdx Jesús tajp xpejn̄ni

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bāj̄l, ni'c cacuaareni guijxh lo nisdoo. ¹⁹ Dxejcti räjp Jesús lojreni:

—Coltanajl narä. Naj riniaaztu bāj̄l, niluxh narä gunä cuedx̄tu rebejn̄.

²⁰ Lagajc dxejc basa'nreni xquijxhreni te sanajlreni laani.

²¹ Che gudejdreni ro'c, bahuiini loj stio'p niguii, Jacoob con bejtzni Juan. Yu'reni nen̄ te barcw con xtadreni, ni laa Zebedeo cayunsa'creni guijxh. Dxejc gurejdx Jesús-reni. ²² Lagajc dxejc basa'nreni barcw nājza xtadreni te sanajlreni Jesús.

Caguluii Jesús xhidajl bejn̄

(Lc. 6:17-19)

²³ Sasajti Jesús guideb nez región xten Galilee, caguluiini nen̄ tejsa rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn̄ guejdxga, guiraa yälguijdx. ²⁴ Biejn diajg reben̄ Siria diidx xcuent ni cayujn Jesús. Sas biäd-näreni guiraa rebenracxhuu ni cayajc guiraloj yälguijdx, yälñayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'ñ tiejxhreni. Dxejcti basiajc Jesús rebejn̄ga. ²⁵ Xhidalduxh ben̄ Galilee huinajlni, nāj reben̄ reguedx Decápolis, nājza

reben_u guedx Jerusalén, nájza reben_u Judea nájza rebejn_u ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuii Jesús loj reben_u xhidajl, huá'pni yejc te dajn. Dxejcti gubig rexpejn_uni ni gurejdxni lojni. ² Dxejc gusloj caguluii Jesús reni'c, scree rájpn_u:

Rebejn_u ni sibaalajz

(Lc. 6:20-23)

³ —Sibaalajz rebejn_u nani nanchee rquinduxhreni xcäl_uracnäj Dios, sa'csi laareni nungäj_ulreni xcäl_urnibee Dios.

⁴ 'Sibaalajz rebejn_u nani rac-huin lajzreni xcuent rextol_ureni, sa'csi sudzucaj Dios xtoj_ulreni, susiäj_ulni lajzreni.

⁵ 'Sibaalajz rebejn_u nani nadolajz nani rlajz guntis si'cni rnibee Dios, sa'csi sacnäj Diosreni lo xcäl_unabajn_ureni lo guedxliujre.

⁶ 'Sibaalajz rebejn_u ni nastoocanu rliaanreni, riojlreni, sa'csi rlajzreni guiba_usa'ctisreni nez loj Dios, sa'csi sudeed Dios lojreni guiraa ni rniabreni.

⁷ 'Sibaalajz rebejn_u nani rulaslajz sa'reni, sa'csi sulaslajza Diosreni.

⁸ 'Sibaalajz rebejn_u nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ 'Sibaalajz rebejn_u nani ruscuedcxilajz sabejn_ureni, sa'csi laareni sirilajreni rexi'n Dios.

¹⁰ 'Sibaalajz rebejn_u nani rusutijp lajzreni che rusacsí bejn_ureni sa'csi naba_usa'creni nez loj Dios, sa'csi xtenreni najc xcäl_urnibee Dios xhaguibaa.

¹¹ 'Col_uspaalajztu che gusacsí bejn_utu til_unäjreni la'tu, guiniireni guiraloj didx-xhii xcuent xtidxä.

¹² Col_uguibaalajz, col_ubalajz sa'csi xhaguibaali sunidxduxh

Dios xcuent xtzuuntu. Sigajcza basacsíreni reniguii ni gubajñ galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Rájpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejnñi dxejc? Susälreni sejdga detz yu', suláj bejnñ yejcni.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jiäuuni nenñ te caj. Maazru huen soobni jiaa nenñ te gandilieer te gusänijni loj guiraa rebejnñ ni tre' nenñ yu'. ¹⁶ Xcälñabansa'ctu najc si'c te bajl loj rebenñ guedxliuj. Suhuiireni xtzunsa'ctu dxejc siliä'preni xpalä'n xtadtu ni yu' xhaguibaa.

Ruluii Jesús xcuent leii

¹⁷ Rájpzani:

—Na'c guntu xhigab siädgudzucaá leii xten toMoisés, niclaza rediidx ni baluii redad ni gunii xtidx Dios. Xhet siäddzucaádini, narä siälä te guluiäpacni si'cni najcni.

¹⁸ Rniliápac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlajz gusaan te diidx nani caj loj leii, mase te didxbäzni, luxh ruluiini gun bejnñ si'c, laani guxiduxh sajcní lajdx Dios guibaa. Niluxh renani rucua diajg xtidx leii, luxh rujnpacreni si'cni caj lo leii, ruluiizani leii, beñsacduxh gacni lajdx Dios guibaa.

²⁰ Ni'cni rniä lojtu, palga ditu gunsa'cru xtzun Dios, ditu guibañsa'cru loj reni najñ xcuent xleii toMoisés, näjza loj rebenñ guidoo ni laa farisee, dipactu jiu' lajdx Dios xhaguibaa.

*Rului Jesús xcuent yälrdxe'ch**(Lc. 12:57-59)*²¹ Räj pzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni neṅ latzguiib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “beṅnayällajz” sidejndni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlnuni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiäl_xгаа diidx con sa'lu, dxejcti guibi'lu te gac gusa'nlu gojn xtenlu.

²⁵ Palga yu' chu rdxe'ch lojlu, basquejn basiäj_l diidx con laani lagajc cheni sasanäjlnuni lonezyuy te di guteedni luj lo juejz. Luxh juejz sutedni luj loj reguixhajg te gusaureni luj neṅ latzguiib. ²⁶ Rniliápac lojlu: “Dilu guirii ro'c palga dilu cue'c guralii meel nani guiniabni lojlu.”

*Rului Jesús xcuent yälrusguee sa'ni*²⁷ Räj pzani:

—Abiejn diajgtu guniireni galoo: “Na'c guesnäjtü gunaa nani di gac chäältu.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neṅ lastooni. ²⁹ Palga balojlu ladbee rujn rujnlu dojl, gulääni basäl_ni te laad sa'csi hueenru gunijtlu te balojlu quela chää guideb tiejxhlu gabijl. ³⁰ Palga ṅaalu ladbee rujn rujnlu dojl, batiu'ni sa'csi hueenru gunijtlu te ṅaalu quela chää guideb tiejxhlu gabijl.

*Rului Jesús xcuent yälruo'n chääł bejn**(Mt. 19:9; Mr. 10:11-12; Lc. 16:18)*³¹ Räj pzani:

—Abiejn diajgtu guniireni galoo: “Chutis niguii ni rlanj guro'n chäälni, nanabtis gudeedni te guijt nani rnii abaro'nni chäälni.” ³² Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³ Räjpzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiro, ³⁶ niclaza por lagajc bitiyeyclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitisl: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸ Räjpzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rlanj tilnäjl te xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoynluni lojni, na'c gäblu: “Xhetini.”

⁴³ 'Abiejn diajgtu gunii rebeḅgool: "Colchanälajz sa'tu. Colguidxe'ch loj renani rdxe'ch lojtu." ⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsireni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebeḅsa'c sigajcza lo rebeḅ guijdx. Rujnzani riab nisguij lo rebeḅsa'c sigajcza lo rebeḅguijdx. ⁴⁶ Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: "Xchan", lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸ Colyajc beḅsa'c si'c ni najc xtadtu ni yu' xhaguibaa.

6

Rului Jesús xho gudeedni gojn

¹ Räjzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neḅ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

Rului Jesucrist xho cueedx, guiniabni lo Dios

(Lc. 11:2-4)

⁵ Räjzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni neñ reyu' cadro riel̄ xtidx Dios, näjza guiraa resquiin, näjza nez ronejz te ruhuii rebejn̄ xho rujnreni. Rniliápac, acua'reni gaan xtenreni. ⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn̄.

⁷ 'Cheni caniitu lo Dios, na'c guinisactu balti huält rediidx nani aguniitu. Si'c rujn rebejn̄ nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. ⁸ Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni.

⁹ Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰ Sujjääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäj̄l̄ lajzlu redojl̄ xtenu si'c riäj̄l̄ lajznu redojl̄ xten rebejn̄ ni rujn dojl̄ loonu.

¹³ Na'c gusaanlu jiaabnu xhigabguijdx,

baslaa nuure lo dojl̄,

sa'csi xten guejblu najc yälrnibee, yäl̄nadip näjza yäl̄rdim-bicha' par tejpas.

Sugacni si'c.

¹⁴ Palga la'tu gusiäj̄l̄ lajztu redojl̄ ni rujn rebejn̄ lojtu, xtadtu ni yu' xhaguibaa susiäj̄l̄za lajzni rextojltu. ¹⁵ Palga ditu gusiäj̄l̄ lajztu redojl̄ ni rujn rebejn̄ lojtu, sigajcza xtadnu ni yu' xhaguibaa di lajzni jiäj̄l̄za rextojltu.

Ruluii Jesús xho gucua'n bejn̄

¹⁶ Räjpzani:

—Che rucua'ntu na'c guntu si'c rujn rebejn nani rus-guee; rumbaa lojreni te fii rebejn cagucua'nreni. Rniliä acua'reni rexgaanreni. ¹⁷ Niluxh la'tu, che rucua'ntu, colcun yejctu, colquiib lojtu ¹⁸ te na'c gacbee rebejn cagucua'ntu, xtadtistu suhüi cagucuanxhiga'tztu. Xtadtu ni cahüi xhi cayunxhiga'tztu suniidxni xhi xca'tu nez loj rebejn.

Yäl_nasa'c ni yu' xhaguibaa

(Lc. 12:33-34)

¹⁹ Räj_pzani:

—Na'c gapdajntu yäl_nasa'c lo guedxliujre cadro rajw reman o rribtiejn xhixtentu, niluxh richu' gubaan rolizj bejn te rbajnreni. ²⁰ Hueenru ga'ptu xcäl_nasa'ctu xhaguibaa cadro di reman gauu, diza rexhixtentu cuibtiejn, diza regubaan jiu' te cuanreni. ²¹ Sa'csi cadro yu' xcäl_nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²² Räj_pzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, jlinacäiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Di-gacdi guntu xtzuun Dios palga caguiiltistu xcäl_nasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcäl_naba-jntu, xhicha gautu, xhicha yätu, niclaza naatu xhicha lajd gajcwtu. Yäl_nabajn sajcrü lo yälrajw, luxh sajcrü tiejxhtu lo xhajbtu. ²⁶ Col_hüi remane' ni rtajt xhaguibaa.

Direni cue'c binij, dizareni guilia' gäjł, dizareni cuchee xhi gaureni neņ yu', luxh xtadtu ni yu' xhaguibaa rudeedni xhi rajwreni. ĵLaa xhet sajcdirutu loj remane'ga, ä?
²⁷ ĵChu tej la'tu sa'csi ru'tu yärsia' sajc tiobrutu ste bo'c jiaaru?

²⁸ 'ĵXhicuent runduxhtu xhigab xcuent xhajbtu? ĵColhuiu reguii ni tre' nesiät! ĵXho roobreni? ĵXho rialreni? Direni gun dzuun, dizareni guzaa xhajbreni.
²⁹ Narä rniä lojtu, nicla rei Salomón guideb najcwni rexhabsa'c xtenni di nisiuchee si'c rsiuchee tej reguiiga.
³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ĵxhixh dini gunduxhru par la'tu, bejñ nani guxii rililajz? ³¹ Ni'cni na'c chutu yärsia' guntu xhigab: “ĵXhicha guidaunu, xhicha guidunnu, xhicha gacwnu?” ³² Sa'csi rebejñ nani di gumbee Dios xhigabtisga rujnreni, caguuilreni guiraa recosga. Niluxh xtadtu ni yu' xhaguibaa anajñni xhini'c rquiintu.
³³ Colquixгаа yälrnibee xten Dios näjza yälñabansa'c si'cni rlajz Dios dxejc sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

Na'c cubeetu sa'tu *(Lc. 6:37-38, 41-42)*

¹ Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejñ, si'cza sutixh Dios lojtu. ³ ĵXhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ĵXhicuent gäblu lo sa'lu, nädoñnu cuää guijxh ni yu' neņ balojlu, luxh dilu fii loj yagro ni yu' neņ balojlu? ⁵ Beñgujdx ni

rusguee, guläxгаа yagro ni yu' balojlu te gac fisa'clu te cuäálu guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

Colnab, colquiiil, colgusejz rolä'

(Lc. 11:9-13; 6:31)

⁷ Räjpzani:

—Colnab lo Dios te guniidxni nani rniabtu. Colquiiilni te guidxäjltuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzareni lojni.

⁹ '¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäjł, ¿la sudeedni te bäl? ¹¹ Palga la'tu ni najc bejn guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹² 'Ni'cni guira'ti cos ni rlajztu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl'nabajn najc dää

(Lc. 13:24)

¹³ 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijł, luxh xhidajłreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga**(Lc. 6:43-44)*¹⁵ Răj pzani:

—Colnatiro rebejn nani rlajz gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. ¹⁸ Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajc gumbeetu beṅsa'c sa'csi rujnreni dzunsa'c.

*Xhet guiraadi bejn jiu' lo xcälrnibee Dios**(Lc. 13:25-27)*²¹ Răj pzani:

—Xhet guiraadi renani rnii, “Dad, Dad”, jiu' lo xcälrnibee Dios xhaguibaa. Ganaxtis renani rujn si'cni rlajz Xtadä ni yu' xhaguibaa. ²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläänu rebeṅdxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Colbicaṅ loä beṅlatsiaj.”

*Tio'p cimient**(Lc. 6:47-49; Mr. 1:22)*²⁴ Răj pzani:

—Chutis nani rucuadajg diidx nani caniä, luxh ruzoob xtidxä, laani najc si'c te beṅsiṅ nani basoob rolizni yejc te guilaj. ²⁵ Che biajb nisguij, biäjṅ nis gueuu, gubi' bej,

bidinreni yec yu'ga sas di yu'ga niajb sa'csi sojbni yec guilajga. ²⁶ Nani riejn diajgni xtidxä, luxh dini guzoob xtidxä najc si'c te beṅ gualajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejṅga.

²⁸ Che gulujx gunii Jesús rediidxga, lacti bidxeloj rebejṅ rediidx ni baluiini, ²⁹ sa'csi baluiini rebejṅ si'cpac te nani rnibee, xhet si'c ruluiidi rebejṅ ni najn leii.

8

Rusiajc Jesús te bejṅ ni raḷ tiejxhni

(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejṅ huinajlni.

² Dxejcti biääd te beṅracxhuu ni raḷ tiejxhni nez loj Jesús. Bazuxhibni, räjpni:

—Dad, palga rļajzlu, sajc gusiajclu narä.

³ Dxejcti basгаа Jesús ṅaani, gudajnni dade'ga con ṅaani, räjpni:

—Rlazä jiajclu. Siajc tiejxhlu.

Lagajc dxejc gubicaj guejdx ni raḷ tiejxhni. ⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejṅ ni riajc, te fii rebixhojzga abiajclu.

Rusiajc Jesús te xmos capitán roman

(Lc. 7:1-10)

⁵ Che biu' Jesús guedx Capernaum, bidzujṅ te capitán roman nani rnibee te gayuu soldaad. Gunabduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäjĵ jiu' guejblu rolizä. Guinitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnaĵlni:

—Rniliápac lojtu, nicla nenĵ guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajĵ benzijt nez ladjiaa, nez ladjiät, te jiäd-cuenäjreni Abram, Isaac, Jacoob lajdx Dios xhaguibaa. ¹² Luxh rebenĵ Israel nani niajc xi'n Dios sijreni te laad lo yälkäjy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.
Dxejc lagajc orga biajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujĵ Jesús rolijz Pedr, bahuiini naga' xnan-sueegr Pedr, cayacxhuuni, yu'ni xliaa. ¹⁵ Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajĵ benĵ racxhuu

(Mr. 1:32-34; Lc. 4:40-41)

¹⁶ Che biu' guxhijĵ, biädnäreni loj Jesús xhidajĵ bejn ni yu' rebenĵxab lostooreni; con xtiidxni gunibeeni birii guiraa rebenĵxabga. Basiajczani guiraa rebenĵ racxhuu. ¹⁷ Si'c bejnĵni te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcäl_lracxhuunu, sanäzani rexcäl_l-nayanu.

Reni rlajz ninajl Jesús

(Lc. 9:57-62)

¹⁸ Che bahuü Jesús tre' xhidalduxh rebejn guideb gabi cadro suga'ni, gunibeeni tednäjni rexpejn_lpacni stelaad ro' nis. ¹⁹ Dxejcti biääd te bennajn loj Jesús, räjpni:

—Mastr, sisiaäza cadrotis chäálu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xh-aguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexpejn_lpacni räjp lojni:

—Dad, basaan chaxgaä ladxä te chacuatzä xtaä.

²² Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni be_ldojl.

Basiacdxl Jesús te beduxh

(Mr. 4:35-41; Lc. 8:22-25)

²³ Che biu' Jesús ne_l barcw, biu'za rexpejn_lpacni lagajc nenga. ²⁴ Dxejc huäjs te bedonduxh lo nisdoo. Lirusiääzni barcw ne_l nisdoo. Luxh Jesús nagayejsni. ²⁵ Dxejcti huij rexpejn_lpacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni. ²⁷ Dxejc bidxeloduxh rexpejn_lpacni, räjpreni:

—¿Chuni'c najc niguiire? ¡Ahuilaa xho rucua_ldajg bej näjza nisdoo xtiidxni!

Rebe_lndxab ni yu' lajdx regadarenos

(Mr. 5:1-20; Lc. 8:26-39)

²⁸ Che bidzujñ Jesús stelaad nisdoo cadro najc lajdx regadarenos, tio'p bejn ni yu' bendxab lastooreni biäd-chaglojreni Jesús. Rebejnğa riireni neñ rebaa, nialaz-duxhreni, ni'cni rut rajcdi rdejđ nezuyjga. ²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siädđu ree te gusacsılu nuure luxh gad galđi xornu, ä?

³⁰ Nez te laad, zijte' cadro suga'reni, cayajp bejn xhidalro cuch. ³¹ Dxejcti gunab rebendxabga loj Jesús, räjpreni:

—Palga cuäälü nuure, basaan jiu'nu neñ recuchre.

³² Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxunreni, huitejbreni ro' te guilaj, biääzreni neñ nisdoo, gujttireni neñ nis.

³³ Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajcreni näjza ni guzajc redade' ni guyu' rebendxab lastooreni. ³⁴ Dxejcti guiraa rebenguejdxga huichaglojreni Jesús. Che bahui-ireni lojni, gunabduxhreni lojni, jiunejzni lajdxreni.

9

Basiajc Jesús te bejn nani abixu'ñ tiejxhni
(Mr. 2:1-12; Lc. 5:17-26)

¹ Dxejcti biu' Jesús neñ barcw. Gudejđni stelaad ro' nis te bidzujñni lajdxni. ² Ro'c biädnäreni lojni te bejn nani abixu'ñ ñaani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubicaj rextojllu.

³ Dxejcti gaii bennajn ni ruluii xleii Moisés cayujnreni xhigab ensilaareni, caniyaj dee Dios con rextiidxni.

⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx nen lastootu?

⁵ ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” ⁶ Dec gunä te gacbeetu Xi'n Dios ni gujc Niguii rajp yäl̄rnibee lo guedxliujre te gudzucajni dojl̄.

Dxejcti räjpni loj beñracxhuuga:

—Huistie, cua' xta'lu, huij rolijzlu.

⁷ Dxejcti huistie beñracxhuuga, siini rolijzni. ⁸ Che bahuii rebejn lojni, bidxeloduxhrenei, gulä'preni xpala'n Dios, ni badeed yäl̄rnibeega loj rebejn̄.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajnci beñracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpen̄ Israel, gurejzareni lo mex näj Jesús näjza reni najc rexpejn̄pacni. ¹¹ Che bahuii reben̄ guidoo, ni laa refarisee, xhi cayujn Jesús, räjpreni loj rexpejn̄pac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen̄ Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajnci, niluxh rebejn racxhuu ni'c rquiinreni chu gusiajreni. ¹³ Colchäj te colchaseed xhi säloj diidxre ni caj loj reguijtz: “Yälruulaslajz rlazä, dina rlazä guniidxtu guidxaa löä.” Sa'csi narä dina niädtedxä rebensa'c, narä siädtedxä rebendoj] te gusiechlajzreni.

Gunabdiidxreni xcuent yälrucua'n

(Mr. 2:18-22; Lc. 5:33-39)

¹⁴ Dxejcti biäd rexpejn pac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn paclu gucua'n, ä?

¹⁵ Räjp Jesús lojreni:

—Che ruchnaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ 'Rut gundi remiend te ladbiewj con te la' ladcoob sa'csi sixu'n ladcoobga, sutiäjsruni ladbiewjga, sajz xhi-roobru cadro biräjsga. ¹⁷ Niclaza gac guida' bincoob neñ reguidbiewj, sa'csi reguidbiewj siräjśni dxejc sixe' bin, sinijtzä reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajñ xhajn Jesús

(Mr. 5:21-43; Lc. 8:40-56)

¹⁸ La] ni caniini rediidxga, biäd te dade' ni rnibee neñ guidoo xten rexpejn Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub ñaalu yejcni te guibañsacni.

¹⁹ Dxejcti huisu Jesús, sanäni Jairo. Näj rexpejn pacni sanajlreneni. ²⁰ Luxh guyu' te gunaracxhuu nani agujc tzubitio'p ijz cayajcni yälguidxbäii. Bidzujñni nez dejtz Jesús, gudajñni ro' xhajn, ²¹ sa'csi bejñni xhigab neñ

lastooni: “Palga sajc canätis ro' xhajnbi, siacä.” ²² Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yälirililajz xtenlu abasiaj-clu.

Luxh lagajc dxejc biajc gunaaga.

²³ Cheni biu' Jesús rolijz dade' nani rnibee nen xquidoo rexpē Israel, bahuiini rebejn ni roḷ bizej näjza xhidajl rebejn ni cabedxa' cayoon, li te biejj cayajc, dxejc ²⁴ räjpni loj rebejnğa:

—Colguibicaj. Nagayejstis dxa'pga, gajdni guet.

Dxejc rebejnğa alga ruxhiznäjreni Jesús. ²⁵ Cheni abirii rebejn nen yu', biu' Jesús, gunaazni naa dxape', dxejc huistie dxape'ga. ²⁶ Dxejcti bire'ch diidxga guiraa nen reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl tio'p bejn̄ni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzujn̄ Jesús cadro caya'nni, gubigreni lojni. Dxejcti gunabdiidx Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹ Dxejcti gudajnni balojreni, räjpni:

—Sugacni si'cpacni rililajztu.

³⁰ Lagajc dxejc bixal balojreni. Sas räjp̄pac Jesús lojreni: —Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi nen reguejdxga.

Basnii Jesús te gop

³² Che biriireni cadro biajc baloj rebejn_{ga}, biääd sgaii bejn _{biädnäreni} te gop loj Jesús. Yu' xprit be_{nd}xab ne_n lastoo bejn_{ga}. ³³ Che barilaagw Jesús xprit be_{nd}xab ne_n lastoo bengopga, guslogajcni caniini. Rdxeloduxh rebejn _{räjpreni}:

—Gajdpacnu guihui sa' redzuunre lajdx rexpejn _{Israel}.

³⁴ Dxejc rebe_n guidoo ni najc refarisee, räjpreni:

—Rbääni rexprit be_{nd}xab con yäl_{rn}ibee xten be_{nd}xabro.

Rulaslajz Jesús rebejn

³⁵ Gudejd Jesús guiraa reguedxro näjza reguedxbäz, basule'ni xtidx Dios ne_n reguidoo xten rexpejn _{Israel}. Basääbni diidx xten xcäl_{rn}ibee Dios. Basiajczani guiraloj yäl_{rac}xhuu, guiraloj yäl_guijdx ni rajc bejn _{ne_n reguejdxga}. ³⁶ Che bahuiini loj rebe_n xhidajl biaduxhni rebejn_{ga} sa'csi rdebya' lajzreni, rac-huin lajzreni, najczeni si'c najc rexiiil nani di ga'p baxtoor. ³⁷ Dxejcti räjpni loj rexpejn_{pacni}:

—Guliipac xhidalduxh be_n guedxliuj di gan xtidxä, luxh guxii najc reni guluiireni; najcni si'c gäj_l ni agojl guilia', niluxh ruti mos ni guilia'ni. ³⁸ Co_{ln}ab lo Dad nani najc xtenni guedxliujre te guxhal_{ni} rebejn _{ni sajc} guluii rebe_n guedxliujre, gaczeni si'c mos ni rlia' gäj_l.

10

Gule Jesús guitzubitio'p rexpejn_{pacni}

(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejn_{pacni}, badeedni yäl_{rn}ibee lojreni te gurilaagwreni rexprit be_{nd}xab lastoo bejn _{näjza} te gusiajcreni guiraloj yäl_guijdx näjza yäl_{rac}xhuu.

² Laj reguitzubitio'p rexpejn_{ni} ni guleni najc: Simón, ni laaza Pedr; Andrés bejtz Simón; Jacob xi'n Zebedeo;

Juan bejtz Jacob; ³ Felipe; Bartolomé; Tomás; Mateo, ni najc colectoor; Jacob, xi'n Alfeo; Lebeo ni rniireni Tadeo; ⁴ Simón, te bejn ni yu' loj recananita; Judas Iscariote, nani bateed Jesús ladzṇaa rebejn nani rdxe'ch lojni.

Baxhal Jesús rexpejnṇpacni gutie'chreni diidx
(*Mr. 6:7-13; Lc. 9:1-6*)

⁵ Guitzubitio'p rebejnṇre baxhal Jesús. Baliidxnireni räjpni:

—Na'c cháätu nez cad yu' rebejn ni di gumbee Dios. Na'c jiu'tu lajdx reben samaritan. ⁶ Colchäxgaa lo rexpejn Israel nani agunijt nen dojl. ⁷ Colchäj, colzäbdiidx lo rebejn, colye'tz lojreni xcälṇnibee Dios abidzungajxh. ⁸ Colgusiajc ben racxhuu, colgusiajc tiejxh rebejn ni ral guejch tiejxhreni, colguspajn bengut. Colgurilaagw xprit bendxab lastoo rebejn. Ligaj cua'tu yälṇnibee, ligajza colyejn dzuun.

⁹ Räjpszani:

—Na'c chanätu oor, niclaza pla't, niclaza coobr nen xdobdäjltu, ¹⁰ niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäjł xca'ni xhi gauni.

¹¹ Räjpszani:

—Che guidzujntu xhitis te guedxro, xhitis te guedxbäz, colquuil te beṇsa'c. Rolijztisni coljia'n dxejli ni jiunejztu guejdxga. ¹² Cheni jiu'tu nen yu', colṇni xtidx Dios lo rebejnṇga. ¹³ Palga najcreni bejn ni numbee Dios, sujia'n yälṇbedxilajz loj rebejnṇga. Niluxh palga direni gac beṇsa'c, naaddireni xca'reni xtidx Dios, suguibi' yälṇbedxilajzga lojtu, coljiunejz ro'c. ¹⁴ Palga direni gusaan jiu'tu rolizreni, palga di rlajzreni gucuadiajgreni xtiidxtu, dxejc coljiunejz roliz bejnṇga, o coljiunejz guejdxga, dxejc colcuijb guxhuj ni'tu si'c te seen gulälazreni

xtidx Dios. ¹⁵ Rniliápac lojtu, dxej ni gun Dios xcälguxhtisni, te yälguxhtisoru gun Dios rebejn̄ga, quela yälguxhtis ni gujc reben̄ guedx Sodoma näj Gomorra.

Yälrusacsí ni siääd

¹⁶ Räjpszani:

—¡Colhuiire! Narä suxhałä la'tu si'c xile' nez loj reloob, ni'cni colgacnasin̄duxh si'c najc te bäl, colyajcza nadolajz si'c te palom. ¹⁷ Colnatiro rebejn̄ sa'csi sutedreni la'tu ladznaa rexcuxhtisreni, siguijnzareneni la'tu nen̄ xquidooreni. ¹⁸ Sinäzareneni la'tu nez loj regubier, nez loj rereii xcuent rextidxä, te gusule'tu xtidxä nez lojreni näjza nez loj rebejn̄ nani di gumbee Dios. ¹⁹ Cheni chanäreneni la'tu nez loj reguxhtis, na'c guntu xhigab xho guiniitu, ni claza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' nen̄ lastootu, laani guinii nen̄ lastootu.

²¹ 'Luxh rebejn̄ sutedreni lagajc bejtzreni ladznaa reni ju'treni. Redad sutedreni lagajc xi'nreni, rexi'n bejn̄ sidxe'chzareneni lo xcuzajnreni te ju't bejn̄ xcuzajnreni. ²² Guiraa rebejn̄ guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl̄nabajn̄ par tejpas. ²³ Che guirinajlreni la'tu te gusacsíreni la'tu nen̄ te guejdx, colguxun̄ ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn̄ Israel ansde jääd Xi'n Dios ni gujc Niguii.

²⁴ 'Di te bejn̄ ni casieedgaj ben̄roru lo xmastrni, diza te mos gac ben̄roru lo xlamni. ²⁵ Te bejn̄ ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee ben̄dxab, ¿xho direni cuälajza Beelzebú rexi'nni, ä?

*Chuni'c nanab guidxejbni**(Lc. 12:2-9)*²⁶ Räj pzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni. ²⁷ Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

²⁹ '¿La di bejn guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbäz ni rutajt.

*Renani rusule' xtidx Jesucrist nez loj rebejn**(Lc. 12:8-9)*³² Räj pzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa. ³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

*Rlia' Jesús sa' bejn**(Lc. 12:51-53; 14:26-27)*³⁴ Räj pzani:

—Na'c guntu xhigab siädnää yälrbexilajz lo reben guedxliujre, xhet yälcedxidi ni siädnää, yälrdxagdijl siädnää. ³⁵ Narä siädnää yälrdxagdijl te bi'n con xtadni; te dxa'p con xnanni; te gulijzni con xnansuegrni. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä. ³⁸ Nani di guu xcrujzni, nalajznu tedni trabajw, jiädnaļni narä, di gacdi gacni xpenä. ³⁹ Nani guidxäl xcäl̄nabaj̄nni lo guedxliujre, sunitni yäl̄nabaj̄n̄ xhaguibaa. Luxh nani gunijt xcäl̄nabaj̄nni lo guedxliujre xcuent rextidä, sidxäl̄ni yäl̄nabansa'c xhaguibaa.

Gaan nani xca'ni
(Mr. 9:41)

⁴⁰ Räjpzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääz-zani Gueb Dios nani baxhaļ narä. ⁴¹ Nani guscuääz te niguii ni rnii xtidx Dios rolijzni sa'csi baxhaļ Dios niguiiga, sica'za bejn̄ga lagajc gaan ni xca' niguii ni rnii xtidx Dios. Nani guscuääz te beṅsa'c rolijzni sa'csi beṅsa'cni, sica'zani lagajc gaan ni xca' beṅsa'cga. ⁴² Chutis nani gudeed mase te xhijgtis nis niäl̄liuj xcuentä lo rebixue're, rniliápac lojtu, direni gunijt, sica'pacreni nani nungäjļ xca'reni.

11

Renani baxhaļ Juan Bautist loj Jesús
(Lc. 7:18-35)

¹ Che gulujx baluii Jesús rexpejn̄pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn̄pacni.

² Juan yu' neṅ latzguiib. Che biejn diajgni xhi cayujn Jesús, baxhaļni tio'p xpejn̄pacni ³ te huinabdiidxreni:

—¿La luj ni najc Crist ni jiäd, ä?, o ¿la silääznu chu stee bejn̄?

⁴ Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiajreni, reni ral tiejxhni, abiajc tiejxhreni; reni di jien diajg, ariejn diajgreni; rebengut, ahüäjzreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni rusläa bejn nen doj. ⁶ Chicbaa renani di jieed narä.

⁷ Cheni sii rebejnğa gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolizj rereii. ⁹ La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni. ¹⁰ Laa Juan nani rusä't ni bacuaa lo reguijtz cadro caj scree:

Narä suxhalä te niguii nani guinii xtidxä nez lojlu; laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejn nani najc beñ huinru lo xcälrnibee Dios xhaguibaa, bejnğa maazru sajcnii loj Juan.

¹² Cheni gucli dxej ni gusloj rusule' Juan Bautist diidx najli, yu'duxh reni rlanjpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rlanjzreni cuäxuuni xcälrnibee Dios. ¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴ Palga rlanjztu chalilajztu, lagajc Juan najc Elías, niguii xten Dios nani bia'n diidx jiääd. ¹⁵ Nani sobdiajg diidx, gucuadiajgni.

¹⁶ ¿Xhicojn guntebloä rebejn nani tre' naj, ä? Najczeni si'c najc rebiiuux nani rguijt nez lo guii cadro rdo', rbejdxreni lo sa'reni, ¹⁷ rniireni: “Bielnu bizej te गया'tu

luxh ditu nuya'. Dxejcti bieḷnu redij ni nabaduxh luxh dizatu nioon.”¹⁸ Sa'csi che biääd Juan dini niajw dizani niä', luxh räjp rebejn najcni te xpejn bendxab.¹⁹ Dxejcti biälä narä, Xi'n Dios ni gujc Niguui, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebendojḷ näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcälḷnajn Dios, ni'cni baxhaḷni guiro'p rebejnre.

Reguejdx gyalajz

(Lc. 10:13-15)

²⁰ Dxejcti gusloj Jesús gudilḷnäjni rebenguejdx cadro benduxhni remilaagwr, sa'csi naaddireni gusiechlajzreni xtojḷreni, sanuutis nabajḷreni neḷ dojḷ. Dxejcti räjpni:

²¹ —¡Gunatiru guedx Corazín! ¡Gunatiro guedx Bet-saida! Paru neḷ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojḷreni, cadxejli niajcwreni neḷ godx, nidäáb cobdäj yejcreni.²² Luxh rniä lojtu: che guidzujḷ dxej ni gun Dios xcälḷguxhtisni, sidejdrutu castiigw loj rebejn ni guläjz guedx Tiro näjza guedx Sidón.²³ Luj guedx Capernaum di gunlu xhigab chäslu xhaguibaa; jiäjt neḷ baa jiajblu, sa'csi paru neḷ guedx Sodoma niajc sa' remilaagwr nani gujc guedxlajdxlu, pet ḷajli tresijc guejdxga.²⁴ Luxh rniä lojtu, dxej ni gun Dios xcälḷguxhtisni, trabajwduxhru tedtu loj rebejn Sodoma.

Colḷta loä, te gusilajztu

(Lc. 10:21-22)

²⁵ Laa dxejcti räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c

biuxbáz. ²⁶ O'n. Guliini, Xtradä, sa'csi rujnlu xhigab si'c najc hueen gacni.

²⁷ 'Guiraa recosre abaniidx Xtradä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni. ²⁸ Colṭaa loä guiraatu nani abadxajg, nani rsina', narä sunidxä yälrusilajz lojtu. ²⁹ Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä beṇṇayedxlajz neṇ lastoä, ni'cni sidxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

12

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

¹ Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn-pacni, guslojreni calädxa'reni doj lo triuu te cayajwrenini.

² Che bahuii rebeṇ guidoo ni laa farisee, räjpreni loj Jesús:

—Ahuii xho rujn rexpejnpaclu dzuun nani di nungäjł gunreni dxej nani rusilajz bejn.

³ Luxh laani räjpni lojreni:

—¿La gajdtu goł xhi caj loj reguijtz xcuent ni bejn toDavid che gulannäjni rexpejnni, ä? ⁴ Biu'reni xquidoo Dios, gudajwreni yätxtiil nani di nungäjł gauni, nicla laani, niclaza rebejn nani sanäni, sa'csi yätxtiilga rebixhojztis rajwni. ⁵ O ¿la gajdtu goł lo reguijtz xten leii cadro caj xcuent rebixhojz, ä? Laareni riu'reni neṇ reguidoo dxej ni rusilajz bejn, rujnreni xtzuunreni niluxh xhet dojłdi rujnreni. ⁶ Narä rniä lojtu, ree suga' tej nani sajcro loj guideega. ⁷ Paru niacbeetu xhi säloj dee: “Yälṛulasajz rlazä, xhet yälrejtdi guidxaa”, ditu nucuaquij redee ni

xhet bejndi. ⁸ Sa'csi narä Xi'n Dios ni gujc Niguui rnibeä dxej ni rusilajz rebejn.

Niguui ni rxu'n naani

(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni. ¹⁰ Ro'c suga' te bejn ni gubijdz te naani. Luxh sa'csi caguuilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcnı beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcnı tebloj si'c najc stelaad naani. ¹⁴ Dxejcti birii rebeñ guidoo ni laa farisee, bachagsa'zarenı te bia'nrenı diidx ju'trenı Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnrenı, biriini ro'c. Xhidajl bejn sanajlnı, dxejc basiajc Jesús guiraa rebeñracxhuu. ¹⁶ Dxejc räjpni lojreni:

—Na'cpac gäbrenı chu najcnı.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa'; rudza jiejnđi diajgnı xse'ni lad nezuyuj.

²⁰ Dini qui'ch nicla te niyt ni cabiejc,
dizani gusuui te duxiil ni cayujn guxh,
dxejli che gunni gaan guinibeeni yälguxhtis.

²¹ Lajtisni sustioob lastoo reben̄ ni digac xpejn̄ Israel.

*Rucuaquijreni Jesús rajpni yäl̄rnibee xten beñdxab
(Mr. 3:19-30; Lc. 11:14-23; 12:10)*

²² Dxejcti biädnäreni loj Jesús te bejn̄ ni di fii, dizani guinii, yu' te beñdxab lastooni. Dxejcti basiajc Jesúsni, te gujc guniini, te gujca bahuiini. ²³ Guiraa rebejn̄ bidxelojreni, räjpreni:

—¿Xhaa laa Xi'n toDavidni, ä?

²⁴ Che biejn̄ diajg reben̄ guidoo ni laa farisee rediidxga, räjpreni:

—Bejn̄re rbää rebeñdxab con yäl̄rnibee xten Beelzebú ni rnibee loj rebeñdxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yäl̄rnibee nani rlia' sa'ni sinitloj; te guedxro sigajc te famil nani rlia' sa'reni, nani ridil̄näj sa'reni, sinitlojreni. ²⁶ Sigajca palga beñdxab rbää sabēñdxabni, silia' sa'reni, dxejc ¿xho gac chanuu xcäl̄rnibeereni? ²⁷ Palga narä rbää rebeñdxab con yäl̄rnibee xten Beelzebú, ¿chu xcäl̄rnibee rajc rbää rexpejntu beñdxab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää rebeñdxab con Xp̄rit xten Dios, guliipacni abidzujn̄ xcäl̄rnibee Dios lojtu.

²⁹ 'Bahuilaare. ¿Xho gac jiu' te bejn̄ cuan rolijz te beñdaan, xho gac cuanni xhixten bejn̄ga, palga dini gulibxgaani beñdaanga? Che abiliib bejn̄ga, sajc cuanni rexhixten bejn̄ga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yäl_rusguee xte bejn sajc gusiäj_l lajzni xtebtis yäl_rniyaj Sprit Dxan xten Dios di Dios gusiäj_l lajzni. ³² Chutis ni guinii xhi te diidx yäl_rniyaj Xi'n Dios ni gujc Niguii sajc gusiäj_l lajzni, luxh chutis ni guiniyaj Sprit Dxan xten Dios, di Dios gusiäj_l lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu beņguijdx ni najc si'c te bäl niälasduhx, ¿xho gac guiniitu te didxsa'c?, ni ro' bejn rniitis rexhigab ni yu' neņ lastoo bejn. ³⁵ Te beņsa'c rniini didxsa'c, sa'csi ganax xhigabsa'c yu' neņ lastooni, te beņguijdx rniitisni cosguijdx sa'csi ganax xhigabguijdx yu' neņ lastooni. ³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yäl_guxhtis, ³⁷ sa'csi lagajc rextiidxlu sujn guinii Dios najclu beņsa'c, lagajc rextiidxlu sujn gunijtlu lo Dios.

Rebeņguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluii xleii toMoisés näjza rebeņ guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebeņguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰ Sa'csi lagajc si'cni guyu' Jonás xque' te bälro choņ dxej, choņ yääl, si'cza chu Xi'n Dios ni gujc Niguii neņ lastoo guedxliuj choņ dxej, choņza yääl. ⁴¹ Cheni gac yäl_guxhtis

xten Dios pet sistie rebejn ni siäd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza rein xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³ Räjpzani:

—Cheni rii te spritdxab nen lastoo te bejn, ricanzajni nez lo reyubijdz, ritiilni cadro gusilajzni, per cad rdxäl-dini. ⁴⁴ Dxejcti rujni xhigab, naani, guibisacä cadro biriä. Cheni rbisacni ro'c, rdzujni si'c rdzuj te bejn nen te yu' ni naya nenni, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadxuudxru lojni te jädlänäjrenini nen lastoo bejnga. Dxejcti rxhiñduxhru bejnga lojni gujcn galoo. Sigajcza gac rebejn ni tre' lo guedxliujre naj.

Xnan Jesús con rebejtni

(Mr. 3:31-35; Lc. 8:19-21)

⁴⁶ Lał ni caninäjni rebejn, bidzujn xnanni con rebejtni, suga'reni rolä' rlaizreni guiniireni lojni. ⁴⁷ Dxejcti biäd tej ni räjp loj Jesús:

—Xnanlu näjza rebejtzlu suga' rolä' rlaizreni guin-inäjreni luj.

⁴⁸ Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani naani nez loj rexpejn pacni, räjpni:

—¡Redee najc xnanä redeeza najc rebetzä! ⁵⁰ Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij

(*Mr. 4:1-9; Lc. 8:4-8*)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. ³ Dxejc gusloj caguluii Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. ⁴ La! ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga. ⁵ Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jäät neñ yuj. ⁶ Che birii gubijdx, bigolreni sa'csi xhetiza xlobaani, dxejc gubijdzni. ⁷ Yu'za binij ni bitejb neñ reguejch. Che guroob reguejchga, dini nusaan niroob regäjle', gubijdztireni. ⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

Xhi pajr najc recuent xten Jesús

(*Mr. 4:10-12; Lc. 8:9-10*)

¹⁰ Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹ Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenini. ¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee,

guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. ¹⁴ Laareni najcreni si'c te soob diidx ni gunii Isafas, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu, sidxelojactu, niluxh ditu fii.

¹⁵ Sa'csi gualajz rebejnre, lastooreni najc si'c te guij, di diajgreni jiejn, luxh niäuzä balojreni, didi fisa'creni con balojreni, didi jiejnza diajgreni, didi gacbeeza lastooreni, didi gusiejch lajzreni guibi'reni loä te gusiäcä lastooreni.

¹⁶ 'La'tu colguibalaznäj balojtu sa'csi rhuisa'ctu, riensa'cza diajgtu. ¹⁷ Rniliäpac, xhidajl redade' ni gunii xtidx Dios, näjza xhidajl beⁿsa'c rlazduxh nuhiii sa' recos ni cahuiitu, luxh direni nuhiiini, r^lajzreni niejn diajgreni sa' rediidx nani cayejn diajgtu, luxh di diajgreni niejnⁿi.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸ 'Colcuadiajg xhi säloj xcuent bejn nani rbe'c binij. ¹⁹ Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesuyj; riääd beⁿdxab rudzucajni rediidx nani biu' neⁿ lastooni. ²⁰ Rebinij nani bitejb nez neⁿ reguij, najc si'c rebejn nani rucuadiajg diidx, gustli rca'reni diidxga, ²¹ luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga. ²² Rebinij nani gurej neⁿ reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yälⁿasa'c ni yu' lo guedxliujre. Dxejcti rex^{cäl}nasa'c xten guedxliujre rusgueereni. Guiraa recosre rutau lo xtidx

Dios nen̄ lastoo rebejn̄re, dini gusaan gac te cosechsa'c nen̄ lastoo rebejn̄re. ²³ Dxejc rebiniy nani rtejb lo reysa'c, ni'c najc si'c rebejn̄ nani rucua diajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn̄ ni najc si'c binij ni gujc te gayuu; yu' bejn̄ ni najc si'c binij ni gujc gayojn̄; yu'za bejn̄ ni najc si'c binij ni gujc galbitzuu.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcäl̄rni bee Dios xhaguibaa najc si'c te bejn̄ nani gule'c ganax triusa'c lo xyujni. ²⁵ Laḷ nagaguejs bejn̄ga, biääd te bejn̄ nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejn̄ga, dxejcti sääni. ²⁶ Cheni gulejn̄ triuuga, birii doj lojni, dxejc biricaj näjza cuanguejch ro'c. ²⁷ Dxejcti räjp remos lo xlam̄reni; “Dad, ḷla et ganax triusa'c di gule'clu, ä? ḷCaxh bazaj cuanguejchre?” ²⁸ Räjp xlam̄reni: “Te bejn̄ ni rdxechlajz loä biädle'cchani.” Dxejcti gunabdiidx rexmosni räjpreni: “ḷLa rla jz guejblu cholädxa'nu recuanguejchga, ä?” ²⁹ Dxejc räjp xlam̄reni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajz gutie'reni triuu chucheeni nen̄ yu'.”

Xcuent bedz muxhtas

(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcäl̄rni bee Dios xhaguibaa najcni si'c te bedz muxhtas nani cue'c te bejn̄ lo xyujni. ³² Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn̄ xpitiäözreni lo xajcw yajgga.

*Xcuent levaduur**(Lc. 13:20-21)*³³ Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo choṅ mediid arin, dxejc ni'c rusaguijni guideb cojbga.

*Xhicuent baluii Jesús ganaxtis con cuent**(Mr. 4:33-34)*

³⁴ Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:

Suiyä diidx con recuent,

suiyä diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesús rebejn, biu'tini nen yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguui; ³⁸ loniaaga najc guedxliuj; retriusa'c najc rebejn nani najc xpejn Dios, nani rucua diajg xtiidxni; recuanguejchga najc rebejn ni najc xpejn bendxab. ³⁹ Bejn nani rdx'e'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguui suxhal rexanglni te jäädgutie'reni, te jäädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx. ⁴² Susälreni rebejn ga nen te or cadre cayecduxh. Ro'c sonduxh reni, sauya'reni läijyreni. ⁴³ Dxejcti

rebeŋsa'c sidimbicha'reni si'c gubijdx lo xcäl_rnibee Xta-dreni. Palga sobdiajgtu, col_gucuadiagsa'c.

Te cossacduxh ni naga'tz

⁴⁴ Räj pzani:

—Si'cza xcäl_rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räj pzani:

—Xcäl_rnibee Dios xhaguibaa najcza si'c najc te dad rapduxh nani caguiil perlsa'c te siini. ⁴⁶ Che bidxälni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäjl

⁴⁷ Räj pzani:

—Xcäl_rnibee Dios xhaguibaa najcza si'c te guijxh ni rusäl bejn lo nis te rniaazreni guiraloj cuaa bäjl. ⁴⁸ Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucheeni neñ te dxijm; nani di gac hueen rusäl_renini te laad. ⁴⁹ Si'cza gac che gac fis guedxliuj; sirii rexangl Dios te sudzucajreni rebenguijdx lo rebeŋsa'c. ⁵⁰ Dxejcti susäl_reni rebenguijdx neñ te oꝛ cadro cayecduxh; ro'c sonduxhreni, sauya'reni läjyreni.

Te beñ rajp

⁵¹ Dxejcti gunabdiidx Jesús lojreni, räj pni:

—¿La racbeetu guiraa ni caniä lojtu, ä?

Dxejcti räj pni:

—O', racbeenuni Dad.

⁵² Dxejcti räj pni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcäl_nasa'cni recos ni nacoob, näjza recos biejuw.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni.

⁵⁴ Huijni lagajc lajdxni. Ro'c gusloj caguluiini neñ xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl_najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. ⁵⁶ Luxh rebisiajnni rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc neñ redxejga Herodes, ni laaza tetarca, biejn diajgni diidx xcuent ni cayujn Jesús. ² Dxejc räjpni lo rexmosni:

—Dee najc Juan Bautist. Pet agubansacni lo rebengut, ni'cni rajpni yälrnibee te rujnni remilagwr.

³ Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääla bejtzni Felipe.

⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rniixtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸ Dxejcti gunaaga, abalijdx xnannini, räjpni lo Herodes: —Loj te platón baniidx bitiuvejcx Juan Bautist.

⁹ Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist nen latzguiib. ¹¹ Sas biädnäreni yejcni lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujn rexpejn Juan sanäreni togoolga te huicua'tzrenini. Dxejcru huisa'nreni diidx loj Jesús.

Bayaan Jesús gaii mi bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni nen te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa nen reguejdxga biriireni. ¹⁴ Che birii Jesús nen barcw, bahuiini loj xhidalduxh bejn, dxejc balazlajznireni, basi-ajcni rebejn nani racxhuu. ¹⁵ Cheni acayu' guxhijn, gubig rexpejnpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjł rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjł, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexepejn̄pacni. Dxejcti rexepejn̄pacni gudisrenini loj reben̄ xhidajł. ²⁰ Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm̄ gudxajni. ²¹ Renani gudajw najcreni si'cti gaii mił niguii, xhet näjdi regunaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²² Sas gunibee Jesús biu' rexepejn̄pacni nen̄ barcw te ganidreni tedreni stee lad nis lałni casadiidxni rebejn̄.

²³ Che guluju basadiidxni rebejn̄, huä'p Jesús yecdajn te xtebni guninäjni Dios Xtadni. Che gojł guxhijñ, ro'c sugaxteb Jesús. ²⁴ Luxh barcw galäii lo nis sasaj. Cagusnibduxh reol̄ barcw, liriääzni lo nis sa'csi cabi' beduxh cadre sääreni. ²⁵ Rsildooru gubig Jesús, bidzujñni lojreni, siädsajni lo nisdoo. ²⁶ Che bahuii rexepejn̄pacni siädsajni lo nisdoo, bidxebreni, räjpreni:

—Colhuii te fantasmni —guredxa'reni sa'csi bidxebduxhreni.

²⁷ Dxejcti gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neṅ barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxejbni, dxejc gusloj cayääzni neṅ nisdoo. Guredxa'ni, räjpni:

—Dad, ;gulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yälirililajz. ¿Xhicuent guctio'p lajzlu?

³² Che huä'preni neṅ barcw, guläzgjajc bej. ³³ Dxejcti renani sää neṅ barcw bazuxhijbreni nez loj Jesús räjpreni:

—Guliipacni najclu Xi'n Dios.

Basajc Jesús rebeṅ racxhuu guedx Genesare't

(Mr. 6:53-56)

³⁴ Che gudejdreni lo nis, bidzujṅreni nez lo reyuj xten Genesare't. ³⁵ Che biembee rebeṅ ro'cni, batie'chreni diidx guideb gabi lajdxreni. Dxejcti biädnäreni guiraa rebeṅ racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

15

Nani ruxhiṅ bejṅ

(Mr. 7:1-23)

¹ Dxejcti gubig gaii rebejṅ nani ruluii leii näjza rebejṅ guidoo ni laa farisee. Siädreni guedx Jerusalén, räjpreni loj Jesús:

² —¿Xhicuent di rexpejṅpaclu jiu xcostrumbr rebeṅ-gool? ¿Xhicuent direni gusoob yälrdiib naareni che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴ Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵ Luxh la'tu

rniitu sajc gāb chutis bejn loj xtadni o loj xnanni: “Digacdi gacnāātu sa'csi guiraa ni rapā abadedāni lo Dios.” ⁶ Luxh chutis ni guinii si'c, xhetru nanabdi gacnājni xtadni o xnani. Si'c ni cabālaztu rextidx Dios te gac chanuutu rexcostumbrtu. ⁷ ĴBejn ni rusguee najctu! Laaca gunii Isaías, bejn nani gunii xtidx Dios xcuenttu cheni rājpn:

⁸ Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹ Xlia'si rajjnreni narä, sa'csi ruluiireni si'c xtidxä reyälrnibee xten reben guedxliuj.

¹⁰ Dxejcti gurejdxni rebejn, rājpn lojreni:

—Colcuadiajg, colyacbee. ¹¹ Nani riu' ro' bejn di guxhin bejnga, sanga nani rii ro' bejnga ni'cni ruxhin bejnga.

¹² Dxejcti rexpejn pacni gubig lojni, rājpreni:

—ĴLa najnlu bidxe'ch rebejn farisee che biejn diajgreni diidx ni guniilu?

¹³ Dxejc laani rājpn:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbrene nen te gueed.

¹⁵ Rājpn Pedr loj Jesús:

—Basule' cuentre loonu.

¹⁶ Rājpn Jesús:

—ĴLa näjza la'tu ditu gacbee, ä? ¹⁷ ĴLa ditu gacbee guiraa ni rajw bejn ru' xque'ni, dxejcti che rdejdn xque'ni, abigo'nni? ¹⁸ Niluxh diidx nani rii ro' bejn, nen lastoo bejn riini; dee ni ruxhin bejn. ¹⁹ Sa'csi nen lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chääl sa'ni; xten rebejn ni rbajn; xten rebejn ni rnii didxxhi lo sa'ni; xtenza rebejn ni rutijl sa'ni. ²⁰ Laa sa' recosre

ni ruxhiṅ bejṅ. Che dini gusoob recostumbr xte yälrdiib ṅaani, di ni'c guxhiṅ bejṅ.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro näjza Sidón. ²² Nejzga rbäjz te gunaa cananee, cabedxa'ni biädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beṅdxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnduxh rexpejṅpacni lojni, räjpreni:

—Barilaagw gunaare, didi rbedxa'ni siädnaṅlṅni luj.

²⁴ Dxejcti räjp Jesús lojni:

—Dios baxhaṅ narä lojtis xpeṅ Israel nani agunijt neṅ dojl.

²⁵ Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejṅ xcuxtiil rexi'nni gusaṅlṅni lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcälṅrililajzlu. Sugac si'cni rlajzlu.

Lagajc dxejc bājz xindxa'pni.

Basiājz Jesús xhidal beṅ racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajṅ, ro'c gurejṅni. ³⁰ Xhidajl bejṅ bidzujṅ cad sobga'ni. Siädnäreni rebeṅ ni rajc ni'ni,

reben_u ni najc lotiä'p, reben_u gop, reben_u ni xheti naani, näjza xhidälro be_n racxhuu, bidzunäjärenini nez loj Jesús. Dxejcti basiajcnireni. ³¹ Ni'cni lacti bidxeloduxh reben_u xhidajlga che bahuiireni rnii regop, riajc reni xheti naani, rsiaj reni rajc ni'ni, ruhii relotiä'p, dxejc rliä'preni xpala'n Xtios rexpen_u Israel.

Badeed Jesús xhi gudajw tajp mil bejn

(Mr. 8:1-10)

³² Gurejdx Jesús rexpejn_upacni räjpni lojreni:

—Riaá rebejn_ure sa'csi agujc cho_n dxej yunäjreni narä luxh xhet ca'direni gaureni. Di rlazä guxhaläreni jiireni rolizjreni palga gajdreni gau didi guidxajgreni lo nezyuj.

³³ Dxejcti räjp rexpejn_upacni lojni:

—¿Xho guidxälnu xhi gau reben_u xhidajlre nez lo reyu-bizjre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn_u lo yuj. ³⁶ Dxejc cua' Jesús guigajdz yätxtiilga näjza rebäjl, badeedni xquixtios lo Dios dxejc gula'ni reyätxtiilga näjza rebäjlga badeednireni loj rexpejn_upacni. Dxejcti laareni gudisreni yätxtiilga con rebäjlga lo rebejn_u xhidajlga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxij_uni. ³⁸ Renani gudajwga najc si'cti tajp mil bejn_u, niluxh xhet näjdi regunaa niclaza rebiuux bigab. ³⁹ Dxejcti basadiidx Jesús rebejn_u, biu'tini ne_n barcw te gudejdni lo nisdoo nez región xten Magdala.

16

Reben guidoo ni laa farisee näjza saducee rniabreni te milagwr si'c te seen

(*Mr. 8:11-13; Lc. 12:54-56*)

¹ Refarisee näjza resaducee bidzujnreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlajzreni guiga' Jesús. ² Dxejc badzu' Jesús diidxre räjpni lojreni:

—Che rajl gudxey, rniitu: “Saru gac te dxej guixee sa'csi naxniaa xhaguibaa.” ³ Che rajl rsil rniitu: “Etladi gac te dxej nadxey sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien xhaguibaa, luxh ditu gumbee xhi säloj reseen xcuent redxeyre, nalajznu recos ni cayajc. ⁴ Reben guijdxre, reben gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(*Mr. 8:14-21*)

⁵ Che gudejd rexpejn pacni stelaad nisdoo biäl-lajzreni ninäreni yätxtiil. ⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab nen lastooreni: “Si'c caniini sa'csi dinu niopnä yätxtiil.” ⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinduxh najc xcälrlilajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mił bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap mił bejn, ä? ¿Bal dxijmni batie'tu? ¹¹ ¿Xhicuent ditu gacbee et yätxtiildi

cagusä'tä cheni caniä lojtu colnati levaduur xten refarisee näjza resaducee?

¹² Dxej cru gucbeereni dini niäjp: “Colnati levaduur xten yätxtiil.” Laani caniini: “Colnaati yälrluliii xten refarisee näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujñ Jesús región xten Cesarea xten guedx Filipo, gunabdiidx Jesús loj rexpejn̄pacni, räjpni:

—¿Chu naj rebejn̄ nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajñ.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn̄di baluii dee lojlu, Xtadätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejl̄u guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrnibee lojlu te gulijdxlu rebejn̄ nani ahuiliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn̄pacni laani najc Guejb Crist.

Gunii Jesús xho guetni

(Mr. 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rex-pejñpacni, guniini lojreni xho nanabpac cháani guedx Jerusalén te ro'c tedni trabajwduxh ladzñaa rebengool xten guidoo, ladzñaa rebixhojz, nájza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²² Dxejcti huinã Pedr Jesús te laad, gusloj cadilñajnini, rãjñni:

—¡Gacnãj Dioslu, Dad! ¡Gurniãlojlu gaclu si'c!

²³ Dxejc gubiré Jesús, rãjñni lo Pedr:

—¡Gubicaj loã bendxab! Na'c rusiejytislu loã. Luj dilu gun xhigab xten Dios, alga xhigab xten rebenguedxliuj rujñlu.

²⁴ Dxejcti rãjñ Jesús loj rexpejñpacni:

—Palga yu' chu tejtũ rãjñ guirinãjñ narã, sucuãlazni lagajc laani, suguuni xcrujñni, nalajñnu tedni trabajw, sujiãdnãjñni narã. ²⁵ Sa'csi nani rãjñ gunni gaan xcãlnabãjñni, sunijñtini. Luxh nani runijñ xcãlnabãjñni por narã, sidxãlni xcãlnabãjñni par tejpas. ²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? ²⁷ Sa'csi narã Xi'n Dios ni gujñ Niguui siälã lo yãlrdimbicha' xten Xtaďã con rexangñni, dxejcti siguixã tebgaj bejn si'ctis ni gujñ xtuunni. ²⁸ Rniliãpac lojtu, loj reni tre' ree ñaj, yu'reni di guet dxejli ni fixgaareni jiälã narã Xi'n Dios ni gujñ Niguui lo xcãlñnibeã.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinã Jesús Pedr, Jacobo, con Juan betz Jacobo, xtebreni huijreni jiaa yejc te dajñ.

² Dxejcti nez lojreni bidxaa xho rujñ lojñi. Lojñi gusloj

rdimbicha' si'c gubijdx; xhajnbn gujc nolbäj si'c te bajl.
³Dxejc bahuigajcreni loj Moisés nájza loj Elías, cayujyreni diidx con Jesús. ⁴Dxejcti räjp Pedr loj Jesús:

—Dad, ¡huenduxh suga'nu ree! Palga rlajzlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

⁵Lałni canii Pedr, biäjť te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcua-diajg xtiidxni.

⁶Che biejn diajg rexpejn̄pac Jesús diidxga, bazuxhi-jbreni, basajbreni lojreni lo yuj, bidxebduxhreni. ⁷Dxejcti gubig Jesús lojreni, batzuubni ñaani yejcreni, räjpni:

—Colchasulii, na'c rdxejbtu.

⁸Che guläs lojreni, lojtis Jesús bahuiireni, rutru sug-anäjdini.

⁹Cheni sayäjťreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibañsacä narä Xi'n Dios ni gujc Niguii lo rebengut.

¹⁰Dxejcti gunabdiidx rexpejn̄pacni lojni:

—¿Xhicuent rnii rebejn̄ ni najn xleii Moisés ganid Elías nanab jiääd, ä?

¹¹Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

¹²niluxh narä rniä lojtu, abiääd Elías, di rebejn̄ nienbeeni, luxh bennäjrenini si'ctis ni rlajzreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

¹³Dxejcti gucbee rexpejn̄pacni caniini xcuent Juan Bautist.

*Jesús basiajc te biuux ni guyu' xpej beñdxab
 (Mr. 9:14-29; Lc. 9:37-43)*

¹⁴ Cheni bidzujñreni cadre tre' xhidajl bejn, gubig te bejn lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguidxgani, yu' huält rtejbni lo guiboo yu' huält rtejbni lo nis. ¹⁶ Biädnäáni loj rexpejnpaclu, luxh di niajcdi nusajcrenini.

¹⁷ Jesús badzu' diidxre lojreni räjpni:

—Benguidx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

¹⁸ Dxejcti gudilñäj Jesús bendxab ni yu' lastoo biuuxga, gunibeeni biriini, lagajc dxejc bjaic biuuxga.

¹⁹ Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu bendxab neñ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliá lojtu, paru najc yärlililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzfactu, xhetliidi yu' ni di gacdi guntu.

²¹ Niluxh sa' bendxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lañni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladzña rebendoj te gusacsíreni narä. ²³ Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guc-huinuxh lajzreni.

Gudixni impuest xten guidoo

²⁴ Che bidzujñ Jesús nájza rexpejn̄pacni guedx Capernaum, biáad rebejn̄ ni rusquijx xcuent guidoo lo Pedr, gunabdiidxreni lojni, rájpreni:

—¿La di xmastrtu quiix impuest xten guidoo?

²⁵ Rájpe Pedr:

—Rguijxnini.

Che biu' Pedr nen̄ yu', ganid Jesús gunii lojni, rájpe:

—¿Xhi rchalolu, Simón? ¿Chuni'c rusquijx rebejn̄ ni rnibee lo guedxliujre? ¿Chuni'c rguijx reimpuet, recuyo't? ¿Reben̄ lajdxreni o reben̄zijt?

²⁶ Badzu' Pedr diidxre rájpe:

—Reben̄zijt.

Rájpe Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bájil ni guiniazxaalu. Ro' bájilga sidxállu te melpla't ni sajl te chatijxlu impuest xcuentä nájza xcuentlu.

18

¿Chuni'c sajcrú lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcní gubig rexpejn̄pac Jesús lojni te gunabdiidxreni:

—¿Chuni'c sajcrú lajdx Dios xhaguibaa?

² Dxejcti gurejdx Jesús te biuxbáz, bazujnini nez galáireni, ³ dxejc rájpe:

—Rniliápac lojtu, palga ditu gusiechlajztu, palga ditu gac nadolajz si'c te biuxbáz, ditu jiu' lajdx Dios xhaguibaa.

⁴ Ni'cni chutis bejn̄ nani gac nadolajz si'c biuxe're, laani gac ni sajcrú lajdx Dios xhaguibaa. ⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezgw jiajbni nen dojl

(Mr. 9:42-48; Lc. 17:1-2)

⁶ Räjzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rehxigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ 'Palga ni'lu o ñaalu gun jiajblu lo dojl, batiu'ni. Hueenru jiu'lu lo xcälñabajn Dios nitiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas. ⁹ Palga te balojlu rujn riajblu lo dojl, gulääni. Hueenru jiu'lu lo xcälñabee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰ Räjzani Jesús lojreni:

—Coñnatiro, andi cuälaztu rebejn ni najc si'c biuxbäzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Niguii biääd te guslaani rebejn nani agunijt nen dojl.

¹² Räjzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' nen gurajl te chatiilni xile' ni gunijt, ä? ¹³ Luxh palga guidxälni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt. ¹⁴ Sigajcza Xtradnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbäzre.

*Xho gunnäjlu bejtzlu**(Lc. 17:3)*¹⁵ Räjpzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejn ni lojlu. Palga saru gucuadiajgni xtiidxlu, abiäjl lajztu. ¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnnga, te arajplu tio'p o choṅ testiigw. ¹⁷ Palga di bejtzlu gucuadiajg xtidx rebejnnga, luxh dizani jiu xtiidxreni, neṅ guidoo huile'c xquejlu loj rebejn ni ricuadiajg xtidx Dios. Palga dizani jiu rebeṅ guidoo, sugacni nez lojlu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliäpac lojtu, guiraa yälguxhtis xten bejn ni di gusiechlajz xtojṛeni ni guntu lo guedxliuj, si'c jia'nni xhaguibaa; guiraa redojl nani gusiäjl lajztu lo guedxliuj sa'csi basiechlajz beṅdojlga, si'cza jia'nni xhaguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. ²⁰ Sa'csi cadrotis nadxagsa' tio'p o choṅ bejn sa'csi rinälajzreni narä, anasuga'ä galäii rebejnnga.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

²² Badzu' Jesús diidxre lojni räjpn:

—Dina guiniä gajdztis huält, rniä gayonbidzuu huält, nalajznu si'ctiza huält basiäjl lajzlu.

Xcuent tio'p bejn ni nazäb meel

²³ 'Xcälrnibee Dios xhaguibaa najc si'c te reii ni rlajz gunni cuent lac nazäb rexmosni lojni. ²⁴ Agusloj cayujnni

xcuentni chela bidzunnäjreni te mos ni nazääb balti mil lojni. ²⁵ Luxh mosre xhet rajpdini te quiixni rexti'nni, ni'c gunibee rei guidon'ni si'c sclav, näjza chäälni, näjza rexi'nni, nägajcza guirali xhixteni, te gaxh xti'nni. ²⁶ Dxejcti mosga bazuxhibni loj xlamni, gunabduxhni lojni, räjpni: “Guläzsijc tiop-chon dxej, Dad, te gac quixä xti'nä.” ²⁷ Dxejcti lamga balazlajzni xmosni, badzucajni guiraa ni nazääb mosga lojni, baslaanini. ²⁸ Cheni birii mosga rolijz xlamni, bidxaagni stee samosni ni nazääb bale'si beex lojni. Gunaaznini, baxhiya'ni yejnni, dx-
ejc räjpni: “Gudijxga ni nazääblu loä.” ²⁹ Dxejcti ste mosga bazuxhibni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni neñ latzguiib te bejnii gaan gudijxni guiraa ni nazääbni. ³¹ Cheni bahuii sgaii mos xhini'c bejnii, gucnaduxhlajzreni, huiye'tzreni lo xlamreni xhi huiyejnii. ³² Dxejcti gurejdx xlamreni mosga, räjpni lojni: “¡Mos guiidx! Narä badzucä di'n ni nazääblu loä, sa'csi gunabduxhlu loä. ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazääbni lo xlamni.

³⁵ Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiälajzpac guiraa redojl ni rujn resa'ni lojni.

19

Jesús ruluii xcuent yälruo'n sa'ni

(Mr. 10:1-12; Lc. 16:18)

¹ Che gulujx gunii Jesús recuentre, biunejnii Galilee, huijni lo región xten Judea, stelaad gueu Jordán. ² Xhidajl bejn birinajlni, ro'c basiajcnii rebeñracxhuu, ³ dxejc gubig

refarisee lojni, rlanjreni gusguesireni Jesús ni'c räjpreni lojni:

—¿La sajc guro'n te niguii cháälni che rlanjztisni, ä?

⁴ Badzu' Jesús diidxre lojreni, räjpni:

—¿La gajdtu goł lo reguijtz nani bacuaa toMoisés cadro caj xho benchee Dios bejn galooli: “Niguii näjza gunaa bencheenireni”? ⁵ Guniiza Moisés: “Ni'cni gusaan niguii xtadni con xnanni te xca'ni cháälni, dxejc dirureni gac tio'p, tejtis bejn najcreni.” ⁶ Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo cháälni te si'c gac guro'nni gunaaga, ä?

⁸ Räjp Jesús lojreni:

—Sa'csi najc lastootu si'c te guij, ni'c basaan toMoisés baro'n niguii cháälni, niluxh galodoo et si'cti gujcní. ⁹ Luxh rniä lojtu, niguii nani gusaan cháälni, luxh xhet dojłdi bennäj cháälni stee niguii, dxejcti guchnaani ste'ca gunaa, rujnni dojł. Sigajcza niguii ni guchnaa gunaaga ni abaro'n cháälhini, rujnza niguiiga dojł.

¹⁰ Dxejc räjp rexpejnpacni lojni:

—Palga si'c najc xluent niguii con cháälni, hueenru na'c guchnaani.

¹¹ Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcăriensa'c ni'ctis racbee. ¹² Yu' xhicuent digacdi guchnaa niguii: yu'reni digacdi guchnaa sa'csi si'c gojłreni; yu'reni digacdi guchnaa sa'csi baxhın sabejnreni; yu'zarení digacdi guchnaarení sa'csi rlanjreni gunreni xtzuuntis Dios. Nani rajc racbeeni rediidxre, sugacbeenireni.

*Biädnäreni rebiuux loj Jesús**(Mr. 10:13-16; Lc. 18:15-17)*

¹³ Dxejcti biädnäreni rebiuxe' loj Jesús te gudzuubni ñaani yejcreni, guiniabni lo Dios xcuentreni. Luxh rex-pejñpacni gudilñäj rebejn ni siädnä rebiuxe'ga. ¹⁴ Dxejc räjp Jesús lojreni:

—Colgusaan guibig rebiuxe' loä, na'c gudxojntureni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni ñaani yejc rebiuxe', biunejzni ro'c.

*Te beñ ni rajp guninäj Jesús**(Mr. 10:17-31; Lc. 18:18-30)*

¹⁶ Dxejc biääd te bi'n lo Jesús, gunabdiidxni lojni; räjpni: —Mastr sa'c, ¿xhini'c nanab gunä te xca'ä yälñabajñ lo Dios par tejpas?

¹⁷ Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlajzlu xca'lu yälñabajñ lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesñäjlu bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx xtadlu con xnanlu, huinälajz sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacáli biuux. ¿Xhiruxni'c riäädx gunä?

²¹ Dxejc räjp Jesús lojni:

—Palga rlaizlu gaclu beṅsa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaä te jädnajllu narä.

²² Cheni biejn diajg bi'nga rediidxre, guc-huinuxh lajzni sa'csi rajpni xhidalduxh xhixtenni.

²³ Sas Jesús räjp loj rexpejnṅpacni:

—Rniliápac lojtu, naganduxh jiu' te beṅ rajp loj xcälṅnibee Dios. ²⁴ Rnisacä lojtu, guyasiru ted te cameii neṅ baloj te guux; naganduxhru jiu' te beṅ ni rajp lo xcälṅnibee Dios.

²⁵ Che biejn diajg rexpejnṅpacni rediidxre, bidxelo-duxhreni, dxejc canabdiidx loj sa'reni:

—¿Chuni'c sajc jiu' lo xcälṅnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejṅ dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliápac lojtu, la'tu ni biädnajltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben guedxliuj, la'tu ni siädnajltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejṅ Israel.

²⁹ Luxh guiraa rebejṅ ni basa'n rolijzni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnajlni narä, rebejṅga sajc te gayuu huält locni gojpni, nägajc ga'preni xcälṅnabajṅ Dios par tejpas.

³⁰ Rebejṅ nani rchalo najcreni beṅroru lo sa'reni nez loj Dios, reni'c gac bejṅ ni guxii sajc nez loj Dios. Rebejṅ nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räjpzani:

—Xcälrnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxälni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhalnireni loj xyujni sayujnreni dzuun. ³ Birisacni, satiilni sgaii mos si'cti rca-gaa, rsil. Bidxaagni sgaii bejn ni xhet cayujndi, suga'sireni nez lo guii. ⁴ Räjpnj lojreni: “Näjza la'tu colchayujn dzuun lo xyuä. Narä siguixä si'cni riäjł xca'tu.” Sä'ti rebejnğa lo dzuun. ⁵ Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpnj loj rebejnğa. ⁶ Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpnj lojreni: “¿Xhicuent suga'tu ree guideb dxej xhet cayujnditu?” ⁷ Dxejc räjpreni lojni: “Sa'csi rut siädtildinu te choyennu dzuun.” Dxejcti räjpnj lojreni: “Näjza la'tu colchayejn dzuun lo xyuä. Narä siguixsa'cätu.” ⁸ Che biu' guxhijn, räjpn lam lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsildo, bejnreni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu

dzuun lo yäl_lnanlaa.” ¹³ Dxejc räjp lamga lo tejreni: “Xam-igwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴ Huij, cua' xmeellu. Narä rlazä quixä bejn_{re} ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?” ¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexp_{ejn}pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladz_naa reni rnibee lo rebixhojz, näjza lo rebejn_{ni} ni najn leii. Laareni sinibeereni guetä. ¹⁹ Suteedreni narä ladz_naa reben_zijz te cubeereni narä quiinreni narä, dxejc gucuaareni narä lo cruju. Luxh ni riojn_{ni} dxej, sibansacä loj reben_gut.

Ni gunab xnan Jacob näjza Juan

(Mr. 10:35-45)

²⁰ Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

²¹ Gunabdiidx Jesús lojni:

—¿Xhini'c rlanjzlu?

Räjp gunaaga lojni:

—Che jiu'lu lo xcäl_{rn}ibeelu, gunibelaa cue tej rexi'nä xladbeelu, steeni cue xladbä_gwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yäl_{rs}acsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

San Mateo 20:23 64 San Mateo 20:33

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtadä ni yu' xhaguibaa alaguleni rebejn̄ga.

²⁴ Che biejn diajg stzuu rexpejn̄pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenz̄ij̄t, rnibeereni rebejn̄ga si'c xlam̄reni. Luxh reni najc rebenro lojreni runnäjreni rebejn̄ga si'ctis ni rlanjreni. ²⁶ Et si'cni gunditu la'tu loj rebejn̄. Chutis rlanj gac benro lojtu, nanab gunni dzuun gacnäjni guiraliitu si'c te mos. ²⁷ Luxh chutis tejt̄u ni rlanj guiliä'p xpala'nni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn̄, badeedzani lagajc yäl̄nabaj̄n xtenni te gudij̄xni baslaani xhidal bejn̄ ni yu' lo dojl̄.

Jesús rusajc tio'p lotiä'p

(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn̄ sanajlni. ³⁰ Dxejcti sobga' tio'p bejn̄ ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudil̄näj rebejn̄reni, te gusäuren̄i ro'reni. Luxh laaren̄i dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlanjtu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddzungajxhreni guedx Jerusalén, bidzujreni te guedxbáz ni laa Betfagé, cuä' dajn ni laa Oliib. Baxhal Jesús tio'p xpejn_npacni, ² räjpni lojreni:

—Colchäj loj guedxbázre ni tre' nez lojtu. Ro'c guidxäلتu te burgunaa caduu näjza teburhuin. Colguxhecn_i, coltanäni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴ Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Siön,

bahuii xreilu siääd lojlu,

nadolajzni bijbni te burbáz, te burbáz, xi'n man ni rujn dzuun, ni ruu cargw.

⁶ Dxejcti huij rexpejn_npacni, bejnreni si'c gunibee Jesús gunreni. ⁷ Biädnäreni burga näjza burbáz xi'nni. Gudixhreni xhajbreni detz burbázga, dxejc gubijb Jesús burbázga. ⁸ Xhidalduxh bejn_n tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadro ted Jesús. ⁹ Rebejn_n ni nijd, näjza reni siääd dejtzn_i gusloj cabedxa'reni, räjpreni:

—¿Xchej guibajn_n Xi'n toDavid! ¿Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús nen_n guedx Jerusalén, guiraa reben_n guejdxga gusloj camojm_n, yu'reni canabdiidxreni loj sa'reni:

—¿Chucha najc bejnre?

¹¹ Yu'zareni räjp:

—Dee najc Jesús, niguii ni rusule' xtidx Dios. Guedx Nazare't xten Galilee siädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús nen guidoro xten Dios, gulääni guiraa rebejn ni caguto' näjza rebejn ni casii. Barexhätni remex xten reni ruchaa meel xten rebejn, näjza reyagxhil xten reni ruto' repalom. ¹³ Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yäl'rbejdx, yäl'rniab loj Dios.” Niluxh la'tu abejntuni xpiliää gubaan.

¹⁴ Lagajc nen guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuii reni rnibee loj rebixhojz, näjza reni najn leii remi-lagwr ni bejn Jesús, luxh biejnza diajgreni xho cabedxa' rebixuxe' caniireni: “Rliä'pnu xpala'nlu Xi'n toreei David”, bidxe'ch rebixhojzga. ¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtü goḷ lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu goḷ rebixux näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi

bidxälni, ganaxhtis balajg caj lo yajgga. Dxejc räjp Jesús lo yajg iigwga:

—¡Nuncru xcaj nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejn-pacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliápac lojtu, palga chalilajzpacktu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²² Guiraa ni guiniabtu loj Dios, palga chalilajzpacktu, sunidxnini.

Xcälrnibee Jesús

(Mr. 11:27-33; Lc. 20:1-8)

²³ Dxejcti biu' Jesús nen guidoro, dxejc laḷ ni caguluiini rebejn gubig reni rnibee loj rebixhojz näjza rebengool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵ ¿Chuni'c gunibee gutiobnis Juan ni rutiobnis? ¿La Dios o la ben guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶ Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl̄rnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadro care' uub.” ²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, ¿chuni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliápac lojtu, reni ruquijx guiraloj, näjza regunab-dxab ganidreni jiu'reni lojtu loj xcäl̄rnibee Dios, ³² sa'csi Juan ni rutiobnis biädluiini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ ¿Colcuadijg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhal̄ baxhuaanga gaii xmosni loj xyujni te chaxiireni cose'ch ni riäj̄l xca' baxhuaanga. ³⁵ Dxejc reni biannäj

yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhalsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejn baxhuaanga xhigab: “Maazru huen gux-halä xi'nä; sucuadiajgrureni xtiidxni.” ³⁸ Cheni bahuiireni lo xi'n baxhuaan xten yujga, bejnreni xhigab: “Deeni jian-näj yujre; do'o guigu'tnuni te jiannänu yujre.” ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiäd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:

—Dini gulazlajz rebejgujdxga, sugu'tnireni, suded-laani xyujni loj ste'ca bejn nani gudeed cose'ch ni riäj xca'ni che gal guire' cose'chga.

⁴² Dxejcti räjp Jesús lojreni:

—¿La gajdtu gol lo reguijtz nani bacuaa dade' nani gunii xtidx Dios galoo? Rediidxre caj ro'c: Guij nani gulälaz reni runchee yu', cua' Dios lagajc guijga gudixhnini squiin yu', sajcruni loj guiraa reguij. Dee bejn Gueb Dios, luxh rdxeloduxhnu dzunrore ni bejnini.

⁴³ 'Ni'cni rniä lojtu, sibicaj xcälrnibee Dios lojtu, sidej-dni loj rebejn nani gudeed ni riäj xca' xcälrnibee Dios, nalajznu renani chalilajzpac xtiidxni. ⁴⁴ Luxh xcuent guijga: nani jiajb lo guijga, silia'ni, per nani guitejb guijga yejcti, li siujyni, gacni däj.

⁴⁵ Che biejn diajg reni rnibee lo rebixhojz näjza re-farisee recuent ni canii Jesús, gucbeerene cagusä'tni lagajc laareni. ⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yäl_ruch_naa

¹ Guslosac canii Jesús lojreni con recuent, räjpni:

² —Xcäl_rnibee Dios najc si'c te reii ni bejn te sa' te guch_naa xi'nmi. ³ Baxha_lni rexmosni te saxiireni regolnejdx chääreni sa', niluxh rebejn_re di r_lajzdireni. ⁴ Dxejc baxha_l_sacni rexmosni, räjpni: “Col_ye'tz loj reni abido_n, agujc comiid. ¿Abagutä balti gonsa'c, gonguro'! Anacchee guira'ti yäl_rajw. Col_taa.” ⁵ Niluxh reni abido_nga di niu xtiidxreni. Tejni sahuui rexyujni, steeni säa lo rexnegosni, ⁶ dxejcti sgaii reni niajc biooz gunaazreni rexmos reii, basacsíreni remosga, sas bagu'trenini. ⁷ Che biejn diajg reiiga, bidxe'chduxhni, baxha_lni rexsoldaadni te sagu'treni guiraa rebenguijdxga, te saze'czareni guejdx cadre rbäjzreni. ⁸ Dxejcti räjpni loj rexmosni: “Guiraa dee anacchee, di nungäj_l jiäädru reni abido_n. ⁹ Col_chäj, pues, lo resquiin lo nezyuj, col_cuejdx chutis bejn ni guidaaagtistu.” ¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc ben_hueen te gudxaj rolizj rei_iga.

¹¹ 'Dxejc biu' reii biädhuuini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. ¹² Dxejc räjp reii lojni: “Xamigwä, ¿xho bejnlu biu'lu ree luxh xhet xhablanijdilu najcwlu?” Dxitis sobga' bejn_ga, xhet rniidini. ¹³ Dxejc räjp reii loj rexmosni: “Col_guliib ni'ni näjza naani, col_säl_ni detzyu' cadre nacäjy te ro'c gonduxhni chubejli reläjyni.” ¹⁴ Sa'csi xhidajl najc reni bidon_luxh guxii najc reni bibee.

*La sajc quiixni impuest
(Mr. 12:13-17; Lc. 20:20-26)*

¹⁵ Dxejcti sii refarisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhaḷreni gaii xpejnreni nájza gaii bejn ni nadxaag Herodes te rájpreni loj Jesús:

—Mastr, anajnnu rniilu ganax didxlii, ruluiizalu xtiidx-pac Dios, luxh dilu jiu xhi rnii rebejn, sa'csi dilu cue bejn ni sajcro lo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni nen lastooreni, dxejc rájpní lojreni:

—¿Benguijdx! ¿Xhicuent rlaiztu guquiiltu nará?

¹⁹ Colguluii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, rájpní:

—¿Chuni'c caj lo meelre?

²¹ Dxejc rájpreni:

—Loj César.

Dxejc rájp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bixeloduxhreni. Dxejc basaanrenini, sä'tireni.

Canabdiidxreni xho gac che guibaḷsac rebejn

(Mr. 12:18-27; Lc. 20:27-40)

²³ Lagajc dxejga bidzujn gaii reni laa saducee, reni di chalilajz sibaḷsac bejn loj rebengut. Gubigreni loj Jesús, gunabdiidxreni, ²⁴ rájpreni:

—Mastr, si'c naj toMoisés, palga yu' te bejn ni abachḡaa, luxh ruti xi'nni che guetni, riäjł guchḡaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachḡaa, dxejc gujtni, luxh di xi'nni niu'. Basa'nni cháälñi lo bejtzni. ²⁶ Sigajcza gusajc ni ro'p bejtzni; sigajcza gusajc

ni riojn bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, nájza gunaaga gujt. ²⁸ Che guibansac rebejnnga lo rebengut, ¿chu tej lo rebejtzga gac chäälpac gunaaga, ni guiraareni bachñaareni gunaaga?

²⁹ Dxejcti badzu' Jesús diidxre lojreni, rájpní:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios. ³⁰ Ni che guibajn rebengut, diru yälruhnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹ Dxejc xcuent yälrbansac loj rebengut, ¿la gajdtu gol reguijtz ni bacuaa toMoisés che rájp Dios xcuent retoxtadgoldoonu: ³² “Nará nacä Xtios Abram, Xtios Isaac, nájza Xtios Jacob”, ä? Dios di gac Xtios bengut, Xtioſtis rebejn ni nabajn najcni.

³³ Che biejn diajg rebejn xtidx Jesús, bixeloduxhrene diidx ni ruluini.

Diidx ni maazru sajc

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn leii, rlajzni guquiiłni Jesús ni'c gunabdiidxni lojni rájpní:

³⁶ —Maſtr, ¿xhi diidx ni gunibee Dios sajczru lojreni caj lo leii?

³⁷ Rájpní Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, nájza guidebgajc xcäriejnlu.”

³⁸ Diidxre ni gunibee Dios najc ni sajczru, luxh ganidni siädni loj rextidx Dios. ³⁹ Ni ro'pga sigajcza najcni: “Huinälajz resa'lu sigajc ni sanälajzlu lagajc luj.”

⁴⁰ Guiro'p remandamientre nanab te guzoob bejn guiraa rediidx ni bacuaa toMoisés nájza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ La_lni tre' refarisee, gunabdiidx Jesús lojreni, rájpmi:

⁴² —¿Xhi rujntu xhigab xcuent Crist? ¿Chu xi'n najcni?

Rájpmeni lojni:

—Laani najc xajg toDavid.

⁴³ Rájpm Jesús lojreni:

—¿Xhicuent rájpm David “Xtadä” lojni che basanij Spirit D_{xan} xten Dios lastooni? Ni'c bacuaa toDavid rediidxre:

⁴⁴ Dad Dios rájpm lo Xtadä,

gurej xladbeä la_l ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: “Dad” lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejliga rutru gojpmi xhi diidx niniabdiidxrureni lojni.

23

Rucuaquij Jesús refarisee nájza rebejn nani najn leii

(Mr. 12:38-40; Lc. 11:37-54; 20:45-47)

¹ Dxejc rájpm Jesús loj reben_u xhidaalga nájza loj rexpejn_u pacni:

² —Rebejn_u ni najn leii nájza refarisee rájpm yäl_unajn te gusule'reni xleii Moisés. ³ Ni'cni colguzoob guiraa rex_utiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴ Rnibeereni gun rebejn_u cos naganduxh ni najc si'c te cargw naduxh ni di gac guu bejn_u, per laareni nicla con te bicuenaareni direni gusniibni. ⁵ Guiraa recos ni rujnreni, rujnrenini te fiitis rebejn_u. Rchaglajzreni rcaj lo cuajsreni nájza roxhajgwreni recaje' cadre yu' tla' guijtz ni caj xtidx Dios lojni. Rustioolzaren_u xi' xhajbreni.

⁶ Rlajzreni ganidreni tedreni lo mex che gal te lanij; rla-jzreni cuereni lo rebancw ni suga' delant neñ reguidobáz.
⁷ Sigajcza rlajzreni guchagro' bejn ñaareni nez lo guii, guiniiza rebejn “Mastr” lojreni.

⁸ 'Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te beñ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc beñroru loj resa'ni. ¹² Sa'csi chutis ni rchaloni najcni beñro lo sa'ni, ni'c sustuiyá lojni, chutis ni najc nadolajz loj Dios, ni'c sunäni beñro lo sa'ni.

¹³ ;Proobzatu remastr xten leii näjzatu refarisee, najctu benguijdx! Sa'csi rudxoñtu jiu' rebejn loj xcälñnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

¹⁴ ;Proobzatu remastr xten leii näjzatu refarisee, najctu benguijdx! Sa'csi rudzucajtu rolijz renanbiuud lañsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵ ;Proobzatu remastr xten leii näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te ganni Dios si'c rajñtuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

¹⁶ ;Proobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neñ guidoo, dxejc sii rniliini dxejc nungäj! guzoobni xtiidxni. ¹⁷ ;Beñ nayääl, beñlotiä'p! ¿Xhini'c saj cru? ¿La oor la guidoro ni rundxan oorga?

¹⁸ Rniizatu: “Palga te bejn guiniliipacni guzä'tni lo bacuug

ni yu' neñ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäj̄l gusoobni xtiidxni.”¹⁹ ;Ben nayääl, beñ lotiä'p! ;Xhini'c sajcrü? ;La gojn o la bacuug nani rundxan gojnga, ä?²⁰ Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni.²¹ Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza neñ guidoro ruzä'tni.²² Sigajcza ni ruzä't guibaa che rniliipacni caguzä'tzani yagxhillo xten Dios näjza lagajc Dios ni sobga' ro'c.

²³ ;Proobzatu remastr xten leii näjzatu refarisee, najctu benguijdx! Bedzxtiil, anis näjza comin ni rajptu, rudeedtu lo Dios tej tantga yejc cade te tzuu, niluxh ditu jiu ni sajcrü lo xtidx Dios, cadre caj xcuent yäl'nabanya, yäl'rulazlajz, näjza yäl'rilihajz. Deeza ni riäj̄lpac guntu la| ni cayujnzatu steega.²⁴ ;La'tu, lotiä'p ni rlajz guluii nezyuj! Riutu rediidx ni guxii sajç, niluxh rediidx ni sacduxh ditu jiuni, najctu si'c beñ ni rbää te rex lo xpla'tni dxejcrü räjmni te cameii.

²⁵ ;Proobzatu remastr xten leii näjzatu refarisee, najctu benguijdx! Rusiatu detz bas näjza pla't luxh nenñi najc-dxuudx. Sigajcza la'tu riuduxhtu recostumbr, luxh lastootu guidxa yäl'gubaa näjza yäl'rdxe'chljz.²⁶ Farisee ni najc lotiä'p: gudibxgaa neñ bas näjza neñ pla't, dxejc näj dejtznı sajç naya.

²⁷ ;Proobzatu remastr xten leii näjzatu refarisee, najctu benguijdx!, sa'csi najctu si'c rebaa ni nacchesa'c; nolbäjreni, saru rluuini, luxh nenreni guidxa dzujt xte bengut näjza bälyudx.²⁸ Sigajcza najctu la'tu. Saru rujn lojtu, rchalo rebeñ najctu beñsa'c, niluxh lastootu guidxa yäl'rusguee näjza yäl'guyalajz.

²⁹ ¡Proobzatu remastr xten leii nájza reфарisee, najctu benguijdx! Runcheetu xpaá redade' ni gunii xtidx Dios galoo, rusucheezatu ro' xpaá rebejn ni gujc bensa'c, ³⁰ dxejc rniitu: “Paru nibajnnu neñ redxej ni gubajñ retóxtadgoldoonu dinu niacnáj reni bagu't redade' ni gunii xtidx Dios.” ³¹ Lagajc con rediidxre rcájptu najctu rexajg renani bagu't redade' nani gunii xtidx Dios. ³² ¡Colguscuáz guntu sa' recos ni guláxtiej retóxtadgoldootu!

³³ ¡La'tu ni najc si'c bäl, la'tu ni najc si'c te bitiaáz guidxa bälñialajz! ¡Xho guntu te na'c cháätu gabijl par tejpas? ³⁴ Ni'cni, guxhalä rexpenä ni guinii xtidxä, nájza beñnajñ, nájza mastr. Luxh yu'reni sugu'ttu sucuaatureni lo cruzj; yu'zareni siguijntu neñ reguidobáz, sirinajltureni guejdx por guejdx. ³⁵ Si'cza yejctu jiajb xtiejn guiraa rebenñadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu neñ guidoro gajxh lo bacuug. ³⁶ Rñiliápac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Rájpa Jesús:

—¡Jerusalén, Jerusalén! Xpejnlu rugu't redade' ni rñii xtidx Dios, rucuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzñi neñ xhigani, per ditu nicájb! ³⁸ Colhuii xho jianxteb xquidootu cuälazrenini. ³⁹ Rñixgää lojtu, naj dirutu fii loä, dxejli che guiniitu: “Benle' Dios nani siääd xcuentni.”

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús nen guidoro te asiini, dxejc gubig rexpejn-pacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliápac nicla tej gui di jia'n yejc sa'ni ree; guiragajc reyu're sibijl.

Cos ni guluijoj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biáád rexpejn-pacni lojni te xhiga'tz gunabdi-idxreni lojni:

—Rlaaznu guiniilu loonu guc gac guiraa recosre. ¿Xhi seen guluijoj ameer jiáádлу nájza che ameer nitloj guedxliuj?

⁴ Dxejc räjp Jesús lojreni:

—¿Colnatiro te rut gusgueedi la'tu! ⁵ Sa'csi su' xhidajl reni jiáád, naareni: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, nájza xcuent cadro rlajz chu guer, na'c guidxejbtu sa'csi si'c nungäjl gac, niluxh gajd galđi nitloj guedxliuj. ⁷ Sa'csi siájs te naciön sidilnájni stee naciön; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajl lajt. ⁸ Luxh guiraa redee cuáxtiejtis retrabajwduxh ni churu chu.

⁹ 'Dxejc guteedreni la'tu ladznaa rebendojl te gusac-síreni la'tu, te gugu'tzarení la'tu, luxh guiraa rebejn sidxe'ch lojtu sa'csi sanälajztu narä. ¹⁰ Nen redxejga, xhidajlreni sibälaz xcälrililajzreni, sidxe'ch lo sa'reni, suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yäl'nabajn par tejpas.

¹⁴ Luxh sisiule' xtidx Dios guideb lo guedxliuj te gacbee guiraa reben_u guedxliuj xtiidxni; dxej_ucru jiääd fis xten Dios.

¹⁵ 'Cheni fiitu asobga' te ben_uguidxduxh nen_u yu' ni najc dxan nen_u guidoro, si'cni gunixgaa toDaniel ni gunii xtidx Dios gacni, bejn_u ni go_l dee sugacbeeni nani rol_{ni}, ¹⁶ dxej_uc renani rbäjz lo guedx Judea, suguxun_ureni gucuat_zlojreni nen_u dajn. ¹⁷ Bejn_u ni niä'p yej_uc xyu'ni dxejga di gal_{di} jäjt_{ni} te chalääni xhixt_{enni} nen_u xyu'ni; ¹⁸ bejn_u nani cayuj_n dzuun lo niaa, na'c guibi'ni niclaza chaxhiini xhajb_{ni}. ¹⁹ ;Proobza regunaa ni nuxi'n, näjza reni cagusiä' báz nen_u redxejga! ²⁰ Col_nabduxh loj Dios xhet nen_{di} redxej ni cayacnalduxhdi nanab guxun_{ditu}, niclaza dxej che rusilajz bejn_u. ²¹ Sa'csi su' trabajwduxh nen_u redxejga, sa' ni gajd bejn_u fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yej_uc redxejga, nicla tej bejn_u di laa. Luxh sutiu' Dios yej_uc redxejga sa'csi rinälajz_{ni} reni aguleni.

²³ 'Nen_u redxejga palga yu' chu naa lojtu: “Col_huii, aree Crist”, o “Col_huii ani arec”, na'c chalilajztuni. ²⁴ Siääd xhidajl niguii ni rusguee, gäbreni najc_{reni} crist; sidzuj_nza rebejn_u ni rusguee ni gäb xtiid_xpac Dios rusule'reni; luxh suj_nreni remilagwr suj_nzaren_{ni} senro, parsi gusgueereni, susgueduxh_{reni} rebejn_u, niluxh rlajz_{reni} gusgueezaren_{ni} rebejn_u ni agule Dios, ni rililajz xtiid_xni. ²⁵ Agunixgää lojtu xhini'c gac. ²⁶ Ni'cni palga naaren_{ni} lojtu: “Bahuii, a crist yu' nez lo reyubijdz”, na'c chäätu; o palga naaren_{ni}: “A crist suga' nen_u yu're”, na'c chalilajzturen_{ni}. ²⁷ Sa'csi si'cni guideb xhaguibaa rien_u che rdinya' ladjiaa näjza ladjjätli, si'cza suhuiitu loä, Xi'n Dios ni guj_uc Niguii, cheni jäälsacä lo guedxliuj. ²⁸ Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguui
(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa re TRABAJWduXH, sicäy lo gubijdx, diruza bäi gusanij, sitejbza rebajl ni yu' xhaguibaa, sinibduXHza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguui, luxh guiraa rebejn ni rbäjz nen guiraa reguejdx lo guedxliujre, sonduXHreni suhuiireni siäd Xi'n Niguui lo reza xhaguibaali. Siädni con yälrnibee näjza yälr dimbichaduxh. ³¹ Dxejc suxhalni rexangli con te trompet ni guscuedxa'reni dipduXH te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'Colguisieed ni ruluu yajg iigw! Che naren reñani che cabääni be'n, asiäd bäi curex, ³³ sigajcza cheni fitu cayajc guiraa recosre, sacbeetu asiädgajxh fis, rolä'li abidzujni. ³⁴ Rniliápac lojtu, guiraa redee sajc lał ni nabajn gaii rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc nen redxej che gubajn toNoé, si'cza gac che jiälä Xi'n Dios ni gujc Niguui. ³⁸ Nen redxe galoo, cheni gajd nisguiduxhga jiajb, rebejn ni nabajn dxejc cayajwreni, cayä'reni, caguchñareni, cagudeedza bejn xindxap'reni guchñaa, dxejli cheni biu' Noé nen barcwro. ³⁹ Direni niacbee xtiidxni; cheni biädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguui. ⁴⁰ Nen redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni col̄susiñ, sa'csi ditu gan xhi dxej jiaäd Dad xtentu. ⁴³ Col̄ganchee, paru niacbee baxhuaan xten yu' cor̄ yääl niääd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni. ⁴⁴ Ni'cni col̄susiñza la'tu, sa'csi siääd Xi'n Dios ni gujc Niguii lagajc or̄ ni ditu gun xhigab jiaädni.

Xcuent te mossa'c näjza te mosguijdx

(Lc. 12:41-48)

⁴⁵ '¿Chuni'c najc mossa'c ni ruzoob diidx, ni basannäj xlam̄ni rebejn̄ ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn̄ xtuunni che guidzujn̄ xlam̄ni. ⁴⁷ Rniliápac lojtu, lam̄ga susa'nni sa' mosga te fiini guiraa xhixtenni. ⁴⁸ Dxejc palga mosga di gusoob xtidx xlam̄ni, gunni xhigab: “Sacladuxh guibi' xlam̄ä”, ⁴⁹ dxejc guisloj cagusacsíni resamosni, guislojni gaunäjni, yänäjni rebengu. ⁵⁰ Dxejc sidzujn̄ xlam̄ni dxej che dini gun xhigab jiaädni, luxh or̄ ni dini gan guidzujn̄ni. ⁵¹ Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

25

Xcuent tzuu gunaa

¹ Räjpa Jesús:

—Pues xcäl̄rniabee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasiñ, sgaireni nayääl. ³ Reni nayäälga sanäreni xcandilreni, niluxh direni nica' sijn̄ se't. ⁴ Niluxh reni nasinga sanäreni sijn̄ se't te guze'creni neñ̄ xcandilreni. ⁵ Sa'csi bi'nga di nidzujungaj, gunaaz bacañ̄ regunadxa'pga, gudiejstireni. ⁶ Dxejc si'cti garol yääl, biejn̄ te xse' ni räjpa: “Bi'n asiääd, col̄chäj, col̄chachaglojni.” ⁷ Guiraa regunaare huistieguxun̄reni, dxejc bensa'creni xcandilreni, te

cuaguijreni. ⁸ Dxejc guigaii regunayääl räjpreni loj reni nasin: “Colgunidxlaa te bo'c se't gusanijnū xcandilnu, sa'csi arlajzni jiuini.” ⁹ Dxejcti regunanasin räjp lojreni: “Digacdini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu.” ¹⁰ Lałni sasii guigaii regunaa-nayäälga se't, bidzujn bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujn regunayäälga, räjpreni: “Dad, Dad, baxhal ro lä'.” ¹² Dxejc räjpni lojreni: “Rniliápac lojtu, dina gumbeātu.”

¹³ Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siäd Xi'n Dios ni gujc Niguii.

Xcuent lam ni badeed meel

¹⁴ 'Xcäl'rnibee Dios xhaguibaa najc si'c te bejn ni agojl guirii chääni zijt te bias. Gurejdxni rexmosni, badeedni meel lojreni.

¹⁵ 'Lo tejni badeedni si'cti gaii mił meel, lo steeni badeedni si'cti tio'p mił, dxejc steeni cua' te mił. Loj tejgani badeedni si'cti ni rujnni xhigab sajc gunnäjreni dzuun, dxejcti biriini xpiajni. ¹⁶ Ni cua' gaii mił meel bejn te dzunro, bejnni gaan sgaii mił meel. ¹⁷ Sigajcza ni cua' tio'p mił meel, bejnni gaan stio'p mił. ¹⁸ Dxejcti ni cua' te mił meel, huicua'tzni xmeel xlamni nen te gueed ni gudäänni lo yuj.

¹⁹ 'Gudejdti balti bäii, dxejc gubi' xlam remosga, bejnni cuent loj guiraareni. ²⁰ Che bidzujn ni cua' gaii mił meel, bidzunnäjni sgaii mił meel ni bejnni gaan, räjpni loj xlamni: “Dad, baniidx guejblu gaii mił loä. Aree sgaii mił meel ni benä gaan.” ²¹ Räjp xlamni lojni dxejc: “Hueenca, mos hueen najclu, rusoobzalu xtidxä. Sa'csi gujclu beñsa'c con te cos báz, naj sunidxä guinibeelu

xhiroobru. Biu' loä, bibalaznäj narä.” ²² Che bidzujñni ni cua' tio'p miĭ meelga, räjpni loj xlamni: “Baniidx guejblu tio'p miĭ meel loä, aree stio'p miĭ meel ni benä gaan.” ²³ Räjp xlamni lojni: “Mbaj. Mos hueen najclu rusoobzalu diidx. Sa'csi gujclu bensa'c con te cosbäz, ñaj sunidxä guinibeelu xhiroobru. Biu' loä, bibalaznäj narä.” ²⁴ Che bidzujñ mos ni cua' te miĭ meel, räjpni lo xlamni: “Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojzalu cadre dilu nutie'ch binij. ²⁵ Ni'cni bidxebä, huicua'tzä xmeellu neñ yuj. Niluxh axh aree xmeellu.” ²⁶ Dxejc räjp xlamni lojni: “iMos guidx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. ²⁷ Riäjl nisa'nlu xmelä neñ te bancw te che nibi'ä nicasacä xmelä con xi'nni ni niujni gaan.” ²⁸ Dxejc räjpni loj reni suga' ro'c: “Colgudzucaj te miĭ meel ni ca'ni colgudeedni loj ni rajp tzuu miĭ meel. ²⁹ Sa'csi loj ni rajp sudedäru, niluxh ni xhet rajpdi sudzucää tudxe'n nani rajpni.” ³⁰ Dxejc räjpni: “Colca' mosre ni xhet sajcdi, colguzälni lo yälñacäjy, cadre chu yälñronduxh, näjza yälñrajw reläjy bejn.”

Yälguxhtis xten reguejdx

³¹ Che jiädsac Xi'n Dios ni gujc Niguui con yälrdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni. ³² Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjgwni. ³⁴ Dxejc säjb rei loj reni suga' xladbeeni: “Coltaa, la'tu ni benle' Xtadä. Coljiu' lo yälñnibee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadre

bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguiib, biädhuiitu narä.” ³⁷ Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te benzijt, baniidxnu cadre bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu neñ latzguiib, biophuiinu lojlu?” ⁴⁰ Dxejc reiiga säjb lojreni: “Rniliápac lojtu, xhitis xhi bejntu loj te rexpenä ni rnii xtidxä mase proobreni, lagajc loä bejntu recosga.”

⁴¹ 'Dxejc säjpszani loj reni suga' ladbäjägwini: “Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpendxabni. ⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³ cuanzaä si'c te benzijt, luxh ditu nunidxlaa cadre nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguiib, niluxh ditu niädhuii loä.” ⁴⁴ Dxejc laareni säjbreni: “Dad, ¿guc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu neñ latzguiib, luxh dinu niacnäjlü?” ⁴⁵ Dxejc säjb reiiga lojreni: “Rniliápac lojtu, loj xhitis ni ditu niacnäjä rebejn ni rililajz xtidxä, mase proobreni naräni ditu niacnäjä.” ⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcälñabajn Dios par tejpas.

26

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpejn-pacni:

²—Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguui ladzñaa reni gucuua narä lo crujz.

³Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejn Israel. Lo xle' Caifás, ni rnibee loj rebixhojz, bidojpreni. ⁴Ro'c bachaagreni diidx xho guiniaazreni Jesús con yälrusguee, te ju'trenini. ⁵Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn. 12:1-8)

⁶Che yu' Jesús guedx Betania, rolijz Simón te bejn ni basiajcni che rañ tiejxhni, ⁷ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸Che bahuii rexpejn pacni xhi cayujni, bidxe'chreni, gusloj cayäjpreni:

—¿Xhicuent casälxlia'ni perfumga? ⁹Perfumre najc nido'ni, nirii xhidajl meel lojni te niacnäjni rebenproob.

¹⁰Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaaare? Ni te coshueen najc dee nani bejnni loä. ¹¹Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹²Nani bejn gunaaare che bachajni perfumre guideb lagaa tiexhä, najcni par guzucheeni narä te guiga'tzä. ¹³Rniliápac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaaare narä, te guinaj lajzreni gunaaare.

Judas bato' Jesús

(Mr. 14:10-11; Lc. 22:3-6)

¹⁴ Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladzñaatu?

Dxejc badeedreni galbitzuu melpla't lojni. ¹⁶ Dxjecli caguuil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpejn pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchäj lo guejdx roliz te dade', colye'tz lojni: “Si'c naj Dad maestr: Asiäddzungajxh xorni, ni'cni rolizlu gaunäjni rexpejn pacni xchej lanipascw.”

¹⁹ Bejnti rexpejn pacni si'cni gunibee Jesús gac, bazucheereni xchej xten pascw.

²⁰ Che biu' guxhijñ, sobga' Jesús lo mex con retzubitio'p xpejn pacni. ²¹ Lal ni cayajwreni räjpni lojreni:

—Rniliá lojtu, yu' tejtü ni guto' narä.

²² Dxejc guc-huinuxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä nen tejtis pla't, laa ni'cni guto' narä.

²⁴ Xi'n Dios ni gujc Niguui sajc si'ctis ni caj loj guijtz xten Dios, per gunatiro bejn ni guto'ni. Huenru na'c niajl bejnga.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ La_l ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn_{pacni}, räjpni:

—Coltajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn_{pacni}, räjpni:

—Guiraatu colyá', ²⁸ sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni nen_{noj}. ²⁹ Luxh rniä lojtu, diruna yä'ä nis nani rii yejc uub, dxejlini yänäsacätu lo xcäl_{rnibee} Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiil.” ³² Dxejc cheni guibansacä lo rebengut, ganidä cha'ä región Galilee, dxejcti jiädnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliápac lojlu, lagajc guxhijnre, nicla gajd guidgaa cuedxa', luxh luj alagulälazlu narä chon_{huält}.

³⁵ Räjp Pedr loj Jesús:

—Masque riäj_l guetnäälü, dina cuälazälu.

Dxejc sigajczä gunii guiraa rexpejn_{pacni}.

Gurejdx-gunab Jesús loj Dios nen_{noj} Getsemaní

(Mr. 14:32-42; Lc. 22:39-46)

³⁶ Dxejcti bidzujn Jesús näjza rexpejn_{pacni} te lajt ni laa Getsemaní, räjpni lojreni:

—Colcuésijc ree laḷ ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.

³⁸ Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcnj, basanlaa tedcaj trabajwduxhre ni tedä, te na'c tedäni. Xhet si'c di ni rlazä gacni; si'cpacni rlazzlu gac, si'c gacni.

⁴⁰ Dxejcti gubi'ni cadro suga' guichon rexpejnpacni, che bidzujn ni ro'c, nagayejsreni. Räjpni lo Pedr:

—ǀLa di najc di nutie'chtu bacal lojtu nicla tebor, ä?

⁴¹ Colguibajn, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlazzlu gacni.

⁴³ Dxejc gubisacni, bidxäl ni rexpejnpacni, nagayejsreni sa'csi yuduxh bacal lojreni. ⁴⁴ Basaannireni, dxejc sä sacni, gurejdx-gunabni lo Dios ni riojn huält, gunisacni lagajc rediidx ni guniini galoo. ⁴⁵ Dxejc huijni cadro suga' rexpejnpacni, räjpni lojreni:

—ǀNaj sii, colguejs, colgusilajz! Abidzujn or ni gutedreni Xi'n Dios ni gujc Niguii ladznäa rebendojl.

⁴⁶ ǀColchastie, colcho', colhuii! Asiääd nani guted narä ladznäa rebendojl.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

⁴⁷ Lalni canii Jesús bidzujn Judas, nani najc tej retzubitio'p xpejnpacni. Bidzunäjni xhidalduxh bejn ni ca'

espaad, ni ca' garo't, najcreni xpejn reni rnibee rebixhojz, najza xpejn rebengool xten rexpejn Israel. ⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgjajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajca guiniabä lo Xtadä, luxh laani suxhalgjajcni gayonb-itzubitio'p mił xanglni gacnäjä narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädnätu spaad najza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä.

⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huiänäni nez loj Caifás, ni rnibee loj guiraa rebixhojz, bidzujnreni cadre abidojp guiraa rebejn nani ruluii leii najza rebengool xten xpejn Israel.

⁵⁸ Dxejcti zit-zijt biädnał Pedr rebejnğa, bidzujnlireni

lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni nen choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajn, räjpni:

—¡Niguiire aguniyajni Dios con xtiidxni! ¿Xhiru testi-igw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—¡Abiga'ni! Riäjł guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ La_l ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu löä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliápac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpej_n; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgaa. ⁷⁵ Dxej_{cru} banalajz Pedr rediidx ni gunii Jesús lojni che räjpni: “Che gajdli guidgaa cuedxa', cho_n huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpej_n Israel bia'nreni diidx xho gunreni ju'treni Jesús. ² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzoo meel pla't loj rebixhojz ni rnibee näjza loj rebengool. ⁴ Räjpn̄i:

—Banitduxhä lo Dios sa'csi bato'ä te bejn̄ ni xhet bejndi.

Dxejc räjpn̄eni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj nen̄ guidoro, biriitini ro'c. Sas huijni, baliibni te duu guejn̄ni, gojln̄i lo te yajg, ro'cti gujtni.

⁶ Rebixhojz ni rnibee batojpn̄eni meelga, räjpn̄eni:

—Di gac di guizäl̄nu meelre nen̄ caj gojn̄ sa'csi najcni xcuent xtiejn̄ te bejn̄.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzijt.

⁸ Ni'cni najli rniireni yujga: “Yurejn̄”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpn̄i: “Cua'reni galbitzoo melpla'tga si'cti basoob rexi'n Israel saj bejn̄ga. ¹⁰ Con meelga guziireni yuj lo bejn̄ ni runchee guejs, sigacni gunibee xtradnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzun̄näjreni Jesús loj Pila't ni najc gubernadoor. Dxejc gunabdiidxni, räjpn̄i lo Jesús:

—¿La luj najc reii xten rexpejn̄ Israel, ä?

Räjpn̄ Jesús lojni:

—Najcni si'cni najlu.

¹² Lał̄ni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjpn̄ Pila't lojni:

—¿La di diajglu jiejn guiraa rediidx ni caniiireni cagu-
cuaquijreni luj, ä?

¹⁴ Per xhetliidi diidxd basejc Jesús, nicla xcuent tejsi
diidx ni bacuaquijrenini. Ni'cni bidxeloduxh guber-
nadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38-19:16)

¹⁵ Neñ redxe lanij rajpreni costumbr ruslaa Pila't tej
bejn ni cue rebejn loj reni yu' neñ latzguiib. ¹⁶ Neñ
redxejga guyu' te bejn ni sääb xtiidxni ni laa Barrabás.

¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaá, la suslaá Barrabás o Jesús ni
laa Crist?

¹⁸ Sa'csi najn Pila't rdxe'chlajzreni lo Jesús, ni'c batee-
drenini lojni.

¹⁹ Lal ni sobga' Pila't lo yajgxhiil cadro rujnni yälgux-
htis, baxhal cháälni diidx lojni, räjpni:

—Xhet gundilu dade'ga ni xhet bejndi, sa'csi nuchej
nadxuudx gunixcalä xcuentni.

²⁰ Niluxh rebixhojz ni rnibee näjza rebengool baquiil-
reni rebejn te gunabreni laa Barrabás, näjza te guet Jesús.

²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaá?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuidi xho guntu. Xcuenttitu najcni.

²⁵ Dxejc guiraa rebejnnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudi-jnreni Jesús dxejc bateednini ladznaa rebejn te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni. ²⁸ Dxejc gulääreni xhajbni, bashuajcwrenini te lad xniaa. ²⁹ Dxejc bencheereni te coron guejch, basälrenini yejcn, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

³⁰ Sas batiobxhejnreni lojni, cua'reni yabixijlga te ni'c batiäjlreni yejcn. ³¹ Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

³² Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

³³ Che bidzujnreni te lajt ni laa Gólgota, nani säloj: dan Calabeer, ³⁴ ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵ Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios.

³⁶ Gurejtireni ro'c, gusloj canäjreni Jesús. ³⁷ Yejc cruuzga bacuaareni te guijt con letro. Lo guijtza rcaj xhini'c najc xtoj̄l nani cayejt. Lo guijtza caj: “Dee najc Jesús reii xten rexpejn̄ Israel.”

³⁸ Nájza tio'p gubaan cuaj lo stio'p cruuz con laani. Tejni cuaj lo te cruuz xladbee Jesús, steeni cuaj xladbäjgwni. ³⁹ Luxh renani sadejd nejzga guniyajreni Jesús, cagusni-ibreni yejreni, ⁴⁰ cayäjpreni lojni:

—Ja'ä! Luj ni nutiexhlu guidoo, luxh chontis dxej niunchesacluni; palga gulii najclu Xi'n Dios, biäjt loj cruuzga.

⁴¹ Nájza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴² —Baslaani xhidajl bejn̄, xhoxh di gacdi guslaani lagajc laani. Palga najcni reii xten rexpejn̄ Israel, sujiäjtni lo cruuz nanaj te chalilajznu xtiidxni. ⁴³ Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruuz sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäjy guideb guedxliuj läidxej hasta rcachon̄ gudxej. ⁴⁶ Si'cti rcachon̄ gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagrga ro' Jesús. ⁴⁹ Dxejc reni tre' ro'c räjp:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpřitni.
⁵¹ Lagajc órga biräsyä' ladro ni zääb neñ guidoro, gujčni tio'p la' jiaali hasta lo yuj. Gujc te xuro, sas gusuj bej reguiro. ⁵² Dxejc gubicaj reguij ni niäuu ro' rebaa, luxh gubansac xhidajl xpejn̄ Dios ni gujt aguc xchej. ⁵³ Dxejcti, che huäjs Jesús lo rebengut, biriireni neñ baa, baluilojreni lo xhidajl bejn̄ ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnajl Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen̄, steeni najc Marii xnan Jacob näjza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujn̄ te benrajp ni siääd guedx Arimatea; laani José. Näjza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejbnini neñ te bariadya, ⁶⁰ huitixhnini neñ xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen̄ näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheereni lanij, bara yääl bidojp rebixhojz ni rnibee näjza rebejn̄ ni laa re-farisee, bidzujn̄reni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibansacni loj rebengut.” ⁶⁴ Ni'c baxhaļ chu chacanäj ro' baaga dxejli guisa' choñ dxej, te di chää rexpejn pacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

⁶⁶ Dxejcti sääreni, basäutzu'tzreni ro' baaga; con resoldaad bacuaareni te sei lojni te rut falđini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj. ⁶ Rutini ree sa'csi agubansacni sigajc ni najni. Coltahuii cadro gojtni. ⁷ Colguxun, colchaye'tz loj rexpejn pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejnpac Jesús. ⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojnrenini. ¹⁰ Dxejc räjpni lojreni: —Na'c guidxejbtu. Colchanä diidx loj rexpənä, chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ Lalni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zareni con rebengool te bia'nreni diidx gudeedreni xhiroob meel lo resoldaad, ¹³ räjpreni lojreni:

—Scree colye'tz lo rebejn: “Lal ni nagayesnu, canäjnu ro' baa, biääd rexpejnpac Jesús guläxhiga'tzreni tiejxhni.” ¹⁴ Palga jiendiajg gubernadoor dee, siohuiinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpən Israel. Najli canisjcreni si'c.

Baxhal Jesús rexpejnpacni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejnpac Jesús lo región Galilee, lo dajn cadro bia'n Jesús diidx guidxaagnireni. ¹⁷ Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj.

¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. ²⁰ Colguluiireni

gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Xtidxcoob Dios ni biädnä dad Jesucrist **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Jul 2022 from source files dated 28 Jun 2022

5cff1274-8dc3-5398-a94d-f6033bb363c9